

1 KÓDIN

Kódin tpémi y:oo Yesu u pi ghêlí daangê ny:ee ngópu, Póól Kódin yi loo, Yesu u pi u ngwo mî ny:ee ngópu, woni knî Yesu u yoo vy:o u ngwo ghê dniye. Nju pi daa yilí Yesu u yoo vy:o ghê dniye, ngmênê yélini daa Nju tpémi, Yesu u yoo vy:o vyílo yi ghê dniye. Yi danêmbum puku yedê mye tóó, Dpodo 18:1-17.

U kuwó dini ghi ngê Póól Epeso doon:aa ya. (Dpodo 19) U kuwó, kópu knî ngmê ngê Yesu u yoo a dyênê too, Kódin. Yoo woni dnye pyââ ti, myenté yi kada pini knî y:oo yoo chámê ngópu. Póól ngê yi kópu yi ny:ee too, ala pweepwee pee d:êê ngê, ye dy:ââ ngê. Ala pweepwee pee ghêlí daangê d:êê ngê, kn:aani mwiyé ngmê d:êê ngê, ye dy:ââ ngê, ngmênê yini nmî ngópu daa tóó, l:âmo a ngee ngópu.

1 ¹Nê Póól, Chóó Lémi ngê a ngmidi noo, Yesu Kédisu u dyépi ngê a pyódu noo. Nmî mbwó Sosíténi u k:ii nipi anye tóó mo. ²Yélini Yesu u yoo vy:o ghê dniye, Kódin, ala pweepwee pee nmye nînh dyede. Chóó Lémi ngê myedê ngmidi nmyoo, Yesu Kédisu ngê nmyi dyââpe pwaâ too, kamî ngê pyódu nmyoo, chóó u yoo vy:o mye kaa nmyoo. Dyámê wope wope n:ii knî y:oo nmî Lémi Yesu Kédisu mye chââchââ ngmê, nipi yi k:ii u yoo vy:o kaa nmyoo. ³Nmî Mî, nmî Lémi Yesu Kédisu u k:ii, dny:oo a ngêêpî nmyo, mb:aamb:aa ngê nmye myedny:oo a vuyuu.

Póól ngê Kódin tpémi yi l:êê díy:o nmî Mî u ngwo doo kwunokwuno

⁴Dye ghi yintómu nmyi l:êê díy:o Chóó Lémi n:aa kwunokwuno ngê, mu kópu u díy:o Yesu Kédisu ka a kââdí nmyoo, kópu mb:aa yilí nmye wunê d:uud:uu too.^a ⁵Kópu yintómu u ntââ ngê a pyódu nmyoo, kópuni u lama a pyede, woni knî nmyi lama dpî yaa dmi, pi knî ye u nkwo nmye tpaépê tumo. ⁶Yesu Kédisu p:uu kópuni nmye n:uu vyi too, yi kópu nmyi vy:o ntênê dê pyaa dmi. ⁷Nmî Mî u Ghê Dmi ngê dpodo yilí yintómu u ntââ ngê a pyódu nmyoo, nmî Lémi Yesu Kédisu u diyédiyé u ngwo nmye t:âât:ââ ngmê. ⁸Yinê adí wêdêwêdê kîgha nmyo, u dí dini ghi n:ii ngê nmî Lémi Yesu Kédisu wa a diyé. Yi ngwo nmyi kóté kîgha têdê dyââpe nmyi p:uu daangmêwa a pyw:oo.^b ⁹Chóó Lémi ngê ntênê daawa dóó nmyo.

^a 1:4 Kílosa 1:3-4 ^b 1:8 Pilipay 1:6; 1 Tes 3:13

Yinë a ngmidi nmyoo, Tp:oo nmî Lémi Yesu Kédisu u k:ii ngmidi ngê yinë a pyódu nmyoo.^c

Póól ngê u ngwo yepê, Modo numo kâádí tóó

¹⁰A tîdê mbwó yoo, mw:ââkó, nmî Lémi Yesu Kédisu u pi mbêmê nîné kwunokwuno nmyo, nmyi nuw:o dmi ngmidi ngê moo pyódu yó, nmyi kópu dyuu ngmidi ngê myoo pyódu yó. Modo numo kâádí tóó. Maa mu ngmidi yidmyinë kîgha, dpodo mu ngmidi p:uu dmyinë dpodo.^d ¹¹A tîdê mbwó yoo, a lama ayimî tóó, noko dnyinté nmyinë pyede. Klowe u yoo knî y:oo yuu a ka kîmîné y:ee ngópu, a ka pê, Noko dnyinté wunê pyede.^e ¹²Nmyi vy:o knî ngmê ala kópu nmye tpaê ngmê, nmyimo, Póól p:uu nmee ndiye, u kópu dyuu vyílo yi ndêndê kópu dyuu. Ngmê knî y:oo apu, Apolosa p:uu nmee ndiye, u kópu dyuu vyílo yi ndêndê kópu dyuu. Ngmê knî y:oo apu, Pita p:uu nmeen:aa ndiye, u kópu dyuu vyílo yi ndêndê kópu dyuu. Ngmê knî y:oo apu, Wu yéli yi pi dmi têdê dé, Yesu Kédisu mu ngmidi vyílo yino cháâchââ. ¹³A tîdê mbwó yoo, yinté daadí ya. Lukwe díy:o Yesu Kédisu nmyi pepe kalê ngópu. Lukwe, nmyinë nmye Póól kîdosi ñedê nmyi l:êê díy:o vyílo yi pwene? Kêle, nê kuu. Daa a chóó a pi mbêmê nî mbápitísím kalê nmyoo. ¹⁴A gha mb:aamb:aa ngê dê pyódu, nmyi vy:o pini daa yilî nî mbápitísím kwólu, Kídisípês pini dê Nkayas yi mo nî mbápitísím kalê doo.^f ¹⁵Doo u ntââ daanmy:ee vi ngmê, Nê ngê chóó u yoo vy:o kaa nmoo. ¹⁶(Ó, myenté, Stepanas mupwoknî a nuwo dê kuwo dmi, mbápitísím a chóó ye my:aa y:ângo, ngmênê a lama daa tóó, apê, Pi m:uu nî mbápitísím kwólu.)^g ¹⁷Daa yoo yi mbápitísím kîgha u l:êê díy:o Yesu Kédisu ngê a ngmidi noo, ngmênê u kópu dyuu tpaê u l:êê díy:o nmye a dy:ââ noo. Daa nuw:o ndî u kópu knî yi mbêmê yoo yi nuw:o n:aa ngmêêpî too, ngmênê Yesu ngê kîdosi ñedê kópuni nmî l:êê díy:o d:uu ngê, yi kópu vyílo yinî tpaê ngê, yi kópu mbêmê Yesu ka u ngwo dpî kélîmî mbê dmi. U ya a nga daa kwo, Yi kópu têdê kópu ngê nî pyódu.^h

**Yesu Kédisu ngê Chóó Lémi u wêdêwêdê ndîi,
u nuw:o ndîi nmo u ngwo a kêma doo**

¹⁸Yélini ndê u maa p:uu a wee, Yesu ngê kîdosi ñedê kópuni d:uu ngê, yinë ye mbodo podo mbodo podo u kópu, ngmênê yi kópu nmî nyongo, u kwo nmî kélîmî mbê dniye, Chóó Lémi ngê u wêdêwêdê mbêmê u ngwo wunê ngêêpî nmo, kóó k:oo wa kaa nmoo.ⁱ ¹⁹Chóó Lémi u kópu puku yedê alanté a tóó, apê,

Yélini yinë ye yi nuw:o dmi ndîi,

^c 1:9 1 Njon 1:3 ^d 1:10 Pilipay 2:2 ^e 1:11-12 Dpodo 18:24-28; 19:1-2 ^f 1:14 Dpodo 18:8
^g 1:16 1 Kódin 16:15 ^h 1:17 1 Kódin 2:1-2,5 ⁱ 1:18 Lóma 1:16

mbodo podo ngê waní pyódu té.

Ndiye pyu ndîi knî ye daanî ng:aa.^j

²⁰Yélini yi nuw:o dmi ndîi, yi yéli y:oo maa ndéndê kn:aadi ngópu, dêêpî pyu knî y:oo mye kn:aadi ngópu. N:ii yoo yi lama yoo yi nuw:o ngmêêpî mb:aamb:aa ngê a tóó, yi yéli y:oo mye kn:aadi ngópu. Dyámê mbêmê yélini yi nuw:o dmi ndîi dé, Chóó Lémi ka ngmênê u kwo yi mbodo podo dé, ye daa ng:aa yédi.

²¹Chóó Lémi chóó u nuw:o u pono vyápê mbê wo, doo u ntâa ngê pyódu nmoo, pi ngê chóó u nuw:o mbêmê Chóó Lémi d:uuwodê pyw:oo. Ngmênê Chóó Lémi ngê maa komo ngmê kpêmî ngê, pi knî ye yi máádi komo u kêmakêma u l:êê díy:o a dy:ââ nmoo. N:ii nmî kópu ka dpî kêlîmî mb:anê, Chóó Lémi ngê dpî ngee. ²²Nmyo Kîdiki tpémi nmyi ndiye pyu knî ye nmî kópu dyuu mbodo podo mbodo podo u kópu dyuu, mu kópu u díy:o nuw:o u kópu dé yinê ye ndîi kópu dé. Nju tpémi nmî kópu dyuu ka daa kêlîmî nyédi, mu kópu u díy:o dpo, N:ii ngê mbwudu nmî ngópu angmê chaa, u ngwo u kwo anmî kêlîmî.^k ²³P:aani p:aani Nju tpémi y:oo dpî mb:ii nmo, kn:aa yéli y:oo myoo mb:ii nmo, mu kópu u díy:o ye nmo tpaépê ngê, yenmîmo, Yesu Kédisu kîdosi íedê nmî l:êê díy:o pwene. Yi kópu p:uu Nju tpémi dpo lvêêdî té, dpo, Wu pini daa vyîlo. Dpo, Pini n:ii nmo t:âât:ââ, dono daawa a pyw:oo, u pi ndîi ngê wa pyódu. Yélini daa Nju tpémi, nmî kópu dyuu yinê ye mbodo podo mbodo podo u kópu dyuu. ²⁴Ngmênê Chóó Lémi ngê Nju tpémi yélini dpo ngmîdi té, Yesu Kédisu ka dpî kêlîmî mbê dmi, Chóó Lémi u wêdêwêdê u ngwo dpo pyw:ee ngmê. Yélini daa Nju tpémi, Chóó Lémi ngê n:ii dpo ngmîdi té, Yesu Kédisu ka myoo kêlîmî mbê dmi, Yesu p:uu Chóó Lémi u nuw:o ndîi u ngwo dpî m:uu ngmê. ²⁵Chóó Lémi ngê kópuni d:uu ngê, k:omo tpile pi knî ye mbodo podo mbodo podo u kópu yi d:uu ngê, ngmênê ndéndê ngê nuw:o ndîi u kópu yi d:uu ngê. K:omo tpile pi knî ye yinê ye Yesu u wêdêwêdê dêpwo ya, kîdosi íedê u ngwo pwene, ngmênê Chóó Lémi ngê u wêdêwêdê mbêmê kpêênî mêdê pyidu ngê. Ló pini ngmê u ntâa yinté kópu angmê d:uu?

²⁶A tídê mbwó yoo, nmyi chóó nmyi p:uu a nuw:o mbê dmyeno. Chóó Lémi ngê u yoo vy:o kaa nmyoo, ngmênê pi knî ye yinê ye, Nuw:o pyu ndîi yi vy:o yilî daa kwo, kada pini yi vy:o yilî daa kwo, yélini yi pi dmi ndîi yi vy:o yilî myedaa kwo.^l ²⁷K:omo tpile yinê ye nmyi nuw:o dmi daa ndîi dé, ngmênê Chóó Lémi ngê a ngmîdi nmyoo, mu kópu u díy:o yélini ye yi nuw:o dmi ndîi dé, mywene ye paa ghê we. K:omo tpile yinê ye kada pini nmyi vy:o daa kwo, ngmênê Chóó Lémi ngê a ngmîdi nmyoo, mu kópu u díy:o kada pini knî ye mywene ye paa ghê we. ²⁸K:omo tpile nmyi yi dmi y:e daa kwo, yinê ye nmyi pi dmi daa ndîi, yinê ye nmyo

j 1:19 Is 29:14 k 1:22 Mát 12:38; Dpodo 17:18 l 1:26 Mát 11:25

k:omo tpile dé, ngmênê Chóó Lémi ngê a ngmidi nmyoo, mu kópu u dîy:o yélini kada a wee, dîyo k:omo tpile ngê u nkwo paa pyaa dniye.^m 29 Yélini nmyi pi dmi daa ndîi, Chóó Lémi ngê a ngmidi nmyoo, kada pini yoo mb:ii too, mu kópu u dîy:o u yi u ngwo daa kwo, Pi ngê chóó u pi a ngópu choo kmîmî. 30 Kada pini yoo mb:ii too, ngmênê Yesu Kédisu ka a kââdî nmyoo. Yesu ngê Chóó Lémi u nuw:o ndîi nmo a kêma ngê, nmî yikî dmi u pwo ghay wo, Chóó Lémi u momu yéli ngê pyódu nmo, dîyo kóo k:oo wa kaa nmo.ⁿ 31 Yesu Kédisu ngê ngee nmo, daa nmî chóó nmî wêdêwêdê mbêmê mb:aamb:aa nmo pyw:ângo. Yi kópu u l:êê dîy:o kópuni puku yedê a tóó, dpî ny:ee yó.

Pi ngmê ngê chóóchóó kîngî chaa kwolo, nmî Lémi yichoo chaa kîgha.^o

Daa nuw:o ndîi u kópu knî yi mbêmê nmyi kêlîmî mbê dniye

2 1 A tîdê mbwó yoo, dini ghi n:ii ngê Chóó Lémi u kópu dyuu nmye noon:aa tpaépê, daa nuw:o ndîi u kópu knî yi mbêmê nmye noon:aa tpaépê dé.^p 2 Alanté nî nuw:o mbê wo, nê, Kódin tpémi ye kópu yilî yi p:uu daanî danê, ngmênê kópuni ndîi kópu ngê a tóó, yi kópu ye n:aa tpaépê. Nê, Yesu Kédisu mu ngmidi p:uu ye n:aa danê, nmyenê, Kîdosi íedê t:ee ngópu, nmî l:êê dîy:o pwene, nmî yikî dmi u pwo ghay wo.^q 3 Dini ghi n:ii ngê nmyi vy:o noon:aa kwo, noo mywenemywene, myenoo nkîngê. 4 Daa nuw:o ndîi u kópu knî yi mbêmê nmye noon:aa danê, ngmênê Chóó Lémi u Ghê Dmi ngê doo a ngêêpî nê, u wêdêwêdê mbêmê nmye noon:aa danê, mbwudu nmyi ngópu noo chapî dé,^r 5 mu kópu u dîy:o daa nuw:o ndîi u kópu knî yi mbêmê paa kêlîmî mbê dmyeno, ngmênê Chóó Lémi u wêdêwêdê mbêmê paa kêlîmî mbê dmyeno.

Chóó Lémi u nuw:o ndîi u kópu dyuu

6 Dini ghi n:ii ngê nmye mwiyé noon:aa danê, daa nuw:o ndîi u kópu knî yi mbêmê nmye noon:aa danê, ngmênê nuw:o ndîi u kópu dyuu ngma kwo, n:ii pi ngmê knî ye nmo tpaépê ngê. Yesu u yoo vy:o yéli, n:ii knî y:oo Yesu p:uu kópu dé mb:aamb:aa ngê dpo w:ee t:oo, yélini yi l:êê ghi dmi mye mb:aamb:aa dé, yi yéli ye yi mo yi kópu dyuu nmo tpaépê ngê. Yi kópu dyuu, daa dyámê mbêmê tpémi yi nuw:o mbêmê u kópu dyuu, myedaa kada pini yoo yi nuw:o mbêmê u kópu dyuu. Yi kada pini yoo dîyo kuwó wa a ghê dmi. 7 Ngmênê kêle, Chóó Lémi u nuw:o ndîi u tumu kópu dyuu vyílo yinmo tpaépê ngê. Chóó Lémi ngê dyámê pê ghêlî daa l:âmo ngê, yi kópu dyuu u ngwo a ngmo ngê, pi knî yi lama daa pyede. Vyílo yi kópu dyuu mbêmê wa ngee nmo, chóó ntee a tóó, yinté pini ngê

^m 1:28 Njems 2:5 ⁿ 1:30 2 Kódin 5:21 ^o 1:31 Jer 9:24; 2 Kódin 10:17

^p 2:1 1 Kódin 1:17 ^q 2:2 Nkal 6:14 ^r 2:4 1 Tes 1:5

wa pyódu nmo.^s ⁸Dyámê mbêmê kada pini yoo yi lama yi kópu dyuu dêpwongmê ya. Yi kópu dyuu yi lama woodoo kwo, ye nmî Lémi ndêndê kídosi nédê daapî t:ee ngópu.^t ⁹Doo u ntâa yi kópu daapêdê w:ee ngópu, mu kópu u díy:o ala kópu puku yedê a tóó,

Chóó Lémi ngê kópuni nuw:o kwólu, apê,

Yélini yi nódo a nuu ghi a tóó,

yi kópu y:e waní d:uu,

yi kópu pi ngê doongê módu,

pi ngê doongê nyongo,

pi ngê myedoongê nuw:o kwólu.^u

¹⁰Ngmênê nmo vyílo dé, Chóó Lémi ngê u Ghê Dmi mbêmê yi tumu kópu dyuu nmo yinê a pywáí ngê. Chóó Lémi u Ghê Dmi ngê yi tumu kópu yilí yintómu yinê dpo pyw:ee té, Chóó Lémi u tumu kópu ndîf dé yinê myedo pyw:ee té. ¹¹Dyimê pywuu nmye ngmênîné kuwo. Pi u tumu kópu dé kn:aa pini u lama daa ya nyédi, chóó u nuw:o k:oo a ya nyédi. Chóó Lémi mye yinté, u tumu kópu ndîf dé chóó u Ghê Dmi u lama a pyede. ¹²Daa nmî chóó nmî nuw:o kní yi mbêmê ala kópu dyuu nmo pyw:ango, ngmênê Chóó Lémi ngê chóó u Ghê Dmi nmo a kpo, mu kópu u díy:o kópuni nmî l:êê díy:o d:uu too, yi kópu dé nmî lama ntênê dny:oo ya.^v ¹³Kópuni nmo tpaépê too, daa nuw:o pyu ndîf kní yi vy:o nmî ndê too, ngmênê Chóó Lémi u Ghê Dmi ngê nmî lama yinê a kalê too. Yélini yi mênê yi Ghéni Dmi mye tóó, yi kópu dyuu ye nmo tpaépê too, ye myeno tpiyé too. ¹⁴Ngmênê yélini yi mênê yi Ghéni Dmi daa tóó, doo u ntâa yi Ghéni Dmi u kópu dyuu d:uudpo pyw:ee ngmê, mu kópu u díy:o d:ud:umbiy:e d:uuwodê w:ee t:oo, yinê ye mbodo podo mbodo podo u kópu dé. Yélini yi mênê Chóó Lémi u Ghê Dmi a tóó, u kópu dyuu dpî ny:ee t:oo, kn:aa yéli y:oo d:uudpî ny:ee t:oo.^w ¹⁵N:ii u mênê yi Ghéni Dmi a tóó, u ntâa kópu yilí yintómu dpî mya té, myedo w:ee té, ngmênê yi pini kuwa yéli y:oo d:uuwodê w:ee ngmê, u gha myed:uudpî m:uu ngmê.

¹⁶Yinté kópu puku yedê mye tóó,

N:uu ngmê u ntâa, nmî Lémi u nuw:o wa m:uu?

N:uu ngmê u ntâa, nmî Lémi wa dêépî kê?

Ngmênê nmî mênê nmî Lémi u Ghê Dmi a tóó, Yesu Kédisu u nuw:o nmî mênê mye tóó.^x

Kódin tpémi mwiyé ntee dnya a ya

3 ¹A tîdê mbwó yoo, dini ghi n:ii ngê nmyi vy:o noo a kwo, k:omo tpile Chóó Lémi u Ghê Dmi nmyi mênê doo ya, ngmênê na a ka nmyi mênê dêpwo ya. Chóó Lémi u nuw:o ndîf u kópu dyuu nmye dpî

^s 2:7 Kílosa 1:26 ^t 2:8 Luukí 23:34; Dpodo 13:27 ^u 2:9 Is 64:4 ^v 2:12 Njon 16:13

^w 2:14 1 Kódin 1:23 ^x 2:16 Is 40:13

vyi too. Yesu Kédisu u yoo vy:o tpómu ntee tpile ngê nmyee ya.^y ²Pyââ ngê tpómu ka ngmo ntee a yémî ngê, yinté noo ndiye kîgha nmyo, nté wêdêwêdê nmye dêp:a kpo, mu kópu u díy:o doo u ntââ daap:ee ma ngópu. Ala ngwo nmyo dp:ee u ntââ dé, ³mu kópu u díy:o nmyi chókó nmyi p:uu nmye nuw:o nyédi, Chókó Lémi u Ghê Dmi u pono dnyinté nmye vyápê nyédi. Yi kópu nmye kíd:a d:êê, mu kópu u díy:o nipi ya nmyi lama dnyinté a tóó, u yi nmye a kwo, Yoo nmî chaa. Lukwe díy:o kn:aa yéli yi maa p:uu dmye ghê dmi. ⁴Lukwe díy:o dyámê mbêmê tpémi yi l:êê ghi dmi nmye d:uud:uu t:oo, ngmê knî y:oo apu, Póól p:uu nmee ndiye, u kópu dyuu vyílo yi ndêndê kópu dyuu, ngmê knî y:oo apu, Apolosa p:uu nmee ndiye, u kópu dyuu vyílo yi ndêndê kópu dyuu.

Chókó Lémi p:uu dpodo pyu yoo

⁵A tídê mbwó yoo, Apolosa k:ii nyi pi dê yi mbêmê lukwe díy:o nmyi yoo dmyenê chaa ngmê. D:ii kada pini ndîfê dê. Nye Chókó Lémi u dpodo pyu dê. Nyi dpodo mbêmê Yesu u yoo vy:o u ngwo nmyi ghê dniye. Dpodoni dê yi p:uu Chókó Lémi ngê a kaa nyópu, vyílo yi dpodo dê y:e dódó doo. ⁶Nmyo Chókó Lémi u yápwo têdê. Yápwo têdê n:uu kpémî ngê, nté woo n:uu kââ, Apolosa y:i doon:aa ngolo, ngmênê Chókó Lémi ngê nt:u yinê t:àngo.^z ⁷N:ii ngê nté woo dpî kââ, u pi têdê, n:ii ngê dpî ngolo, u pi mye têdê. Chókó Lémi mu ngmîdi u pi ndîfê, mu kópu u díy:o nt:u yinê dpî t:oo. ⁸N:ii ngê nté woo dpî kââ, n:ii ngê dpî ngolo, yi pi dê wontoo wontoo, pi mu ngmîdi p:uu a dpodo nódó. N:ii mb:aamb:aa ngê adí dpodo, yápwo têdê chókó ngê mb:aamb:aa ngê wa pwila, n:ii dnyinté adí dpodo, dnyinté wa pwila. ⁹Chókó Lémi p:uu Apolosa k:ii nipi nye dpodo mo.

Nmyo Chókó Lémi u yápwo têdê, myenté u ngomo kamî.^a ¹⁰Chókó Lémi ngê u ntââ ngê a pyódu noo, ngomo km:ee mwiyé n:uu chó, sîment y:i u nkwo nî ndê ngê, ngmênê ala ngwo nmyi kada pini yoo yi ngomo pywuu p:uu mê dpodo té. N:ii yi ngomo p:uu adí dpodo, nuw:o mbêmê choo dpodo. ¹¹Doo u ntââ pi ngmê ngê ngomo kn:ââ daamuwa a t:oo. Yesu Kédisu mbêmê nmyi ngomo a kwo.^b ¹²Yélini yi ngomo p:uu a dpodo nyédi, tpileni ngê a dpodo nyédi, yi tpile u mo u mo dé. Woni knî y:oo chêêpî dpo ngî t:oo, u ngwo a dpodo nyédi, woni knî y:oo nkéli chêêpî pee dpo ngî t:oo, u ngwo a dpodo nyédi, woni knî y:oo silîpê nkól p:uu a t:emî dumo. Woni knî y:oo yimbwi dpo kp:anê t:oo, u ngwo a dpodo nyédi, woni knî y:oo yi yââ ó kâmo yââ p:uu dpî t:ee t:oo. ¹³Kuwókuwó wéni ngê nmî Lémi ngê pi yintómu yi dpodo têdê dmi wa m:uu té. Yi wéni ngê ndyuw:e wa nyow:a, yi dpodo têdê dmi u ngwo wa d:uu té.^c

^y 3:1-2 Hipílu 5:12-13 ^z 3:6 Dpodo 18:4,27-28 ^a 3:9 Epeso 2:20-22 ^b 3:11 1 Pita 2:4-6
^c 3:13-14 1 Kódin 4:5; 2 Tes 1:7-10

14 Pini n:ii u dpodo têtê ghi wêdêwêdê, doo u ntâa ndê ngê daawa ma, yi pini ngê u dpodo u pywuu wa ngee. 15 Ngmênê pini n:ii u dpodo têtê ghi ndê ngê wa ma, u dpodo u pywuu daawa a ngee. Tpileni l:âmo ngê, mwo p:aa ngê wa pyódu, ndê ngê wa ma, ngmênê yi pini ngê chóó u ghê l:âmo daawa ngee, ndê dóó u mênê wa a pwii.

16 A tîdê mbwó yoo, lukwe díy:o Chóó Lémi u ngomo nmyi chaa ngópu. Mumdoó nmyi lama daa tóó, nmyo Chóó Lémi u ngomo, u yâpwo ghi nmyi mênê a tóó, u Ghê Dmi nmyi mênê mye tóó?^d 17 N:ii ngê Chóó Lémi u ngomo wa dyênê, Chóó Lémi ngê u nkwo wa dyênê. Chóó Lémi u ngomo k:oo u yâpwo ghi a tóó, dono y:i daa ya yédi. Nmyo mye ntee dé, nmyo u ngomo ghi dé, dono nmyi mênê kîngmê ya.

18 Nmyi nuw:o knî y:oo kîngê dóó nmyo. Nmyi vy:o pini n:ii ngê dpo, Nê pi ngmê, dyámê mbêmê tpémi yi vy:o a nuw:o ndîi ngê dê pyódu, yi pini ngê yi kópu dpî kéé ngê, Chóó Lémi u nuw:o ndîi u kópu dyuu dé pêdê pyw:ee téne. K:omo tpile dyámê mbêmê tpémi ye yi pini mbodo podo ngê wa pyódu, ngmênê Chóó Lémi ka u nuw:o ndîi ngê wa pyódu. 19 Mu kópu u díy:o dyámê mbêmê tpémi yi nuw:o ndîi u kópu dé Chóó Lémi ka mbodo podo mbodo podo u kópu dé. Yinté kópu puku yedê mye tóó,

N:ii dé yi nuw:o ndîi dé, dpo, Yoo nmî dóó té,
yi yéli dpî dêê dmi, Chóó Lémi ngê u nkwo dpî dóó té.^e

20 Yinté kópu m:uu puku yedê mye tóó,

Nmî Lémi u lama a tóó,
yélini yi nuw:o dmi ndîi,
dnyinté a nuw:o nyédi.^f

21 Yi kópu u l:êê díy:o nmyi ndiye kîgha pyu yoo yi pi dmi mbêmê nmyi chóóchóó namê chaa kîgha nmyo. Nangê vyi, Nê wu pini u yoo vy:o pini ngmê, mu kópu u díy:o nmyi ndiye kîgha pyu yoo yintómu nmyi p:uu a dpodo nyédi. Chóó Lémi ngê kópu yilí yintómu nmye a kpo. 22 Nê, Apolosa pini dê Pita yi k:ii nmyi ndiye kîgha pyu ngê nmo pyede. Chóó Lémi ngê tp:oo módó tp:oo mââ ngê a pyódu nmyoo, dyámê pê nmye a kpo, ghê pini dê pwopwo nmyi p:uu a dpodo mo. Kópuni ala ngwo a dpodo té, nmyi p:uu a dpodo té, mu dini ghi ngê u kópu dé nmyi p:uu amyidnyi dpodo. 23 Myenté Yesu Kédisu p:uu nmyo dpodo té, nmyo u yoo, Yesu Kédisu Chóó Lémi p:uu a dpodo, chóó Tp:oo.

Yesu Kédisu u dyépi yoo

4 1 Apolosa u k:ii ala kópu nyi p:uu dmyinê tpaépê, apii, Yesu Kédisu p:uu a dpodo mo, Chóó Lémi u tumu kópu dyuu y:oo a y:éney:éne ngmê. 2 Dpodo pyu ngê kn:aa yéli yi dnye dmi d:uudpî ny:oo, u lémi mu

^d 3:16 1 Kódin 6:19 ^e 3:19 Njópi 5:13 ^f 3:20 Psalm 94:11

ngmidi u dnye vyílo yichoo nyêmî. ³Yi kópu u l:êê díy:o kópuni a p:uu anmyi vyi t:oo, a ka tédê kópu dé. Kópuni kn:aa pini ngê a p:uu dpí vyi, a ka mye tédê kópu. A chóó a dpodo p:uu kópu myedínî tpaépê ngê.

⁴A dpodo tédê kópu d:oo ngmê kn:aadi ngê, ngmênê a chóó daanî vyi, Dyâápe a p:uu daa t:a. Pini n:ii ngê nmî gha dmi dpo m:uu té, yi kópu a ka yinê wa vyi. ⁵Yi kópu u l:êê díy:o pi u pi ghêlî k:ii nangmê dyênê. Nmî Lémi dini ghi n:ii ngê wa a diyé, tumu kópuni mgídî vy:o a pyede, w:êênî wa yé té, kópuni knî yi l:êê díy:o yoo p:uu a dpodo nyédi, amyedê pywáfî té. Yi ngwo Chóó Lémi ngê u dpodo pyu yoo ntênê wa chaa kalê té.

⁶A tidê mbwó yoo, nmyi l:êê díy:o Apolosa k:ii dyimê pywuu ngê nmye d:a pyódu nyo, mu kópu u díy:o dêêpî kópu ngmê u nt:u kópu pèdê w:ee yó. Yi dêêpî kópu ala, Puku yedê kópu knî yi mbêmê dmyinê paa, u nt:u kópu alanté, Pi ngê pi ngmê u pi kîngî kmî, kn:aa pini u pi kîngî dyênê. ⁷N:ii ngê chóó u pi a kmîmî ngê, ala kópu u kwo nînê tpaépê, Kî pini, n:uu ngê kada pini ngê pyódu nyoo? Kópuni u l:êê díy:o kada pini ngê nyi pyodo, Chóó Lémi ngê nga yinê a kê too, apii? Nyi kuu, ngmênê Chóó Lémi ngê nga yinê a kê too. Lukwe díy:o ñyóóchóó nye chaa kîgha ngê.

⁸A tidê mbwó yoo, lukwe díy:o nmyinê nmye kópu yilî yintómu yi ntââ mbêmê nmye pyede. Lukwe díy:o nmyinê nmye ndáápi ntee pini ngê nmyi pyaa dniye. Lukwe díy:o nmyinê nmye king ntee pini ngê nmye pyede. Yinté dpîno pyede. King ngê ntênê w:ii pyede, ye king ngê myepîdmyi pyódu nmo.^g ⁹K:omo tpile nmo Chóó Lémi u dyépi yoo, ngmênê na a ka Chóó Lémi ngê kuwó pini ngê mède pyódu nmoo. Na a ka vyîda ntee pini ngê pyódu nmoo, pi yintómu yi ngîma, enjel yoo mye yi ngîma, nmî vye tédê dy:ââ nmoo. ¹⁰Yesu Kédisu u l:êê díy:o pi knî ye mbodo podo mbodo podo u yoo ngê nmî pyaa dniye, ngmênê nmyinê nmye Yesu Kédisu ngê nmyi nuw:o dmi ndîî ngê dè pyódu té. Nmî chóó nmî wêdêwêdê p:uu dp:ee nuw:o nyédi, ngmênê nmyinê nmye nmyi wêdêwêdê ndîî. Kuwa yéli y:oo nmî pi dmi a dyede tumo, lukwe díy:o nmyi pi dmi a kmîmî tumo. ¹¹Dye ghi yintómu dono ngê nmo pyede. Nmo dómudómu nyédi, nmo mbwaambwaa nyédi, nmî kpídî dpo chaa dmi, kuwa yéli y:oo a kpakakpaka nmoo, p:aani p:aani nmo lêpî nyédi.^h ¹²Pi knî ye ndapî dpîno dmyinê ngê, nmî nté ndapî yi p:uu nmî chóó nmo dpodo nyédi. N:ii knî nmî p:uu a peede tpaépê nyédi, yi l:êê díy:o nmîno ngêpê nyédi. Dini ghi n:ii ngê a kpakakpaka nmoo, nmîno vyîmî ngê.ⁱ ¹³N:ii knî y:oo nmî pi dmi a dyede ngópu, nmo kwunokwuno too, u yi nmo a kwo yédi, nmîmo, Yi nuw:o dmi nmî ngmêê. Dyámê mbêmê tpémi ye, yinê ye nmo nté dînê péé dono, nmî p:uu a danê nyédi, dpo, Yi tuu dmi a kwo.

¹⁴Daa nmyi mywenemywene kîgha u l:êê díy:o yi kópu d:a d:êê té, ngmênê u ya a nga a kwo, nîmo, Nmyi nuw:o dmi nê wátî té. Mu kópu

^g 4:8 Tpyuu 3:17,21 ^h 4:11 2 Kódin 11:23-27 ⁱ 4:12 Dpodo 18:3; Luukí 6:28

u díy:o nmyo a tp:ee ntee yéli. ¹⁵K:omo tpile pi yono yono yono y:a kní y:oo Yesu Kédisu u pi mbêmê adnyi ndiye kîgha nmyo, ngmênê nê mu ngmídi nmyi mî, mu kópu u díy:o Yesu Kédisu u pi y:i a chóó nmyi nuw:o n:uu kwólu. ¹⁶U l:êê díy:o, u ya a nga a kwo, A p:uu dmyina a mtyímwe ngêêpí.^j ¹⁷Yi kópu u l:êê díy:o Timoti a kada kîné kââ, daa kêmakêma nmyimo mumu ngmê. Yi pini a tp:ee ntee pini, u nuu ghi ndêndê ngê a nódo a tóó. Daa pi dódó pyu, nmî Lémi p:uu nipi nye dpodo mo. Yesu Kédisu u yoo yi l:êê ghi dmi nmye amî vyílf té, kópuni dyuu Yesu u yoo kní ye p:aani p:aani nîmo tpapê too, nmye amyimí vyílf té.^k

¹⁸Nmyi vy:o pi kní ngmê dê mbodo ndîf mbodo ndîf mbê dmi, apu, Nê ngê mêdaamî m:uu nmo. ¹⁹Ngmênê nmî Lémi ngê a maa daawa a nkoko knomomê, ye límílmî ngê anmy:uu m:uu nê. Mbodo ndîf mbodo ndîf u yoo yi ngwo an:uu m:uu té, nê, Mumdoo Chóó Lémi u wêdêwêdê mbêmê a dpodo té, ó yi chóó yi kópu dyuu ye tpapê tumo. ²⁰Chóó Lémi kóó k:oo yoo daa kópu dyuu mbêmê dpí ghê dmi, ngmênê chóó u wêdêwêdê mbêmê dpí ghê dmi.^l ²¹A tp:ee yoo, nmyi nuw:o dmi angênté? Dpodombiy:e nmye wan:uu mbwólu, ó nmyi kópu dmi a kada am:ii l:âmo t:oo, ye mb:aamb:aa ngê u ngwo nmye p:aa t:aa.

Yesu u yoo vy:o pini ngmê ngê Yesu u pi kîngí dyênê

Mátiyu 18:15-17

5 ¹A tp:ee yoo, kópu nmyi p:uu mukídf ny:oo. Nmyi vy:o pini ngmê ngê pyââ ti u kópu ndîf ngmê d:uu ngê. Yintoo kópu ngídf u yoo kní y:oo doongmê d:uu ngópu. Lukwe díy:o Yesu u yoo vy:o pini ngmê ngê yi kópu d:uu ngê. Lukwe díy:o u mî u kpâm kuwó pyââni t:âmo ngê. Apuu! ²Lukwe díy:o u kwo dpîp:e kwódu ngópu. Lukwe díy:o nmyinê mbodo ndîf mbodo ndîf té. U mywene nmye wo ghê wo, nmyi yoo kuwa w:ee kaa ngópu. ³K:omo tpile nmyi vy:o dénîné kwo, ngmênê a nuw:o nmyi vy:o yiwunê kwo. A nuw:o k:oo yi pini wunê kídí kóté kwolo. ⁴Nipi dpo wó yó, a nuw:o nmyi vy:o adín:aa kwo, nmî Lémi Yesu u wêdêwêdê mbêmê yi pini kuwa anmî kââ.^m ⁵Setan kóó k:oo anmî kââ, yi pini too pee yinê paa dyênê ngê, mu kópu u díy:o nmî Lémi wéni n:ii ngê wa a diyé, yi pini u ghê dmi mēpaa ngee ngê.

⁶Lukwe díy:o nmyinê mbodo ndîf mbodo ndîf té. Nmyi lama ka tóó, yis kní tp:oo daa ndîf anyinê ngî, kpo ndîf u mênê anyi yé, anyi pwiyé, kpo yintómu dpí mbwó. Dononi nmyi mênê a tóó, mye yinté, wa k:aa. ⁷Yi dono a ngî tóó, dny:ii dy:ee tóó, yed:oo mb:aamb:aa ngê u ngwo anmyi pyaa dmi. Yesu ngê kamî ngê ntee a pyódu nmyoo, yinté am:ii pyaa dmi. Nmyi lama ka tóó, nmo Nju tpémi, Tp:ee Kaa W:êêw:êê u Naa u dye ghi ngê, nmî ngomo kní yi k:oo yis daa ya yédi, nmo kéké ngê, mbídedí

^j 4:16 Pilipay 3:17 ^k 4:17 Pilipay 2:22 ^l 4:20 1 Kódin 2:4 ^m 5:4-5 1 Tim 1:20

pywápê ngmê wop nmo pîpî ngê. Nmî kn:ââ knî y:oo sipi tp:oo ntee a vya tumo, Chóó Lémi ngê yi tp:ee mââ kaa a w:êê too, daa vya too, Yesu Kédisu yinté mye pwene, ndê ka w:êê nmoo.ⁿ ⁸ Yesu u yoo vy:o nmyi k:ii nipi nmo wee, yis ntee dono nmî mênê kîngmê ya, pi dódó nmî mênê kîngê ya, dyâape nmî p:uu myekîngmê ya.^o

⁹ Pweepwee pee n:ii mwiyé nmye nê dy:ââ ngê, munmyenê, Pyââ ti pyu yoo yi k:ii yakmaapî ngê kêê nangê t:oo. ¹⁰ Daa kuwa yéli yi p:uu nmye noo a danêmbum, yélini a pyââ ti nyédi, a núknweúknwe nyédi, a kpa nyédi, yélini kn:aa yâpwo knî ye a ngêpê nyédi. Yinté yéli p:aa yintómu a pyede. Doo u ntââ daanmyinê kuwo t:oo. ¹¹ Daa kuwa yéli yi p:uu noo a danêmbum, ngmênê Yesu u yoo vy:o yéli yi p:uu noo a danêmbum. Nmyi vy:o pini ngmê ngê yinté kópu ngmadí d:uud:uu, adí pyââ ti, adí núknweúknwe, kn:aa yâpwo knî ye adí ngêpê, yoo yi pi dmi adí dyede dé, nté ndapî yi mb:aami ngê adí ya ó ndee pyu ndîî ngê adí ya, yinté pini u k:ii yakmaapî ngê kêê nangê t:oo.^p

¹²⁻¹³ Doo u ntââ kuwa yéli daanmo kée té, Chóó Lémi ngê yinê wa kóté kalê té. Ngmênê yinté dono nmyi vy:o n:ii ngê choo d:uud:uu, dmyinê kóté kîgha, nmyi yoo kuwa dmyinê kapî. Yinté kópu puku yedê mye tóó, Pi dono nmyi yoo kuwa dmyinê kapî.

Numo kóté kîgha u danêmbum

6 ¹ Dini ghi n:ii ngê nmyi vy:o pini miyó dnyinté a ya nódó, lukwe díy:o kóté y:enê pyu ka dpî lee knî, kuwa. Lukwe díy:o mywene y:e d:uudpî ghê. Yinté kópu nmyi chóó p:ee dmyinê l:âmol:âmo dé. ² Angênté, nmyi lama daa tóó Chóó Lémi u yoo knî y:oo dyámê mbêmê tpémi yintómu y:oo wa kóté kalê t:oo. Mumdo dp:ee ntââ dé, yinté kópu tédê nmyi chóó daanmyi l:âmol:âmo? ³ Lukwe, nmyi lama myedaa tóó, mu dini ghi ngê enjel yoo amy:oon:aa chámê té. Lukwe díy:o nmyi chóó nmyi kópu dyuu daanmyi l:âmol:âmo dé. ⁴ Dini ghi n:ii ngê yinté kópu nmyi vy:o dpî pyódu, lukwe díy:o kóté y:enê pyu knî ye kuwa nmye lêpî nyédi. ⁵ Mywene nmye choo kwo. Mumdo nuw:o pyu nmyi vy:o daangma a kwo, pini n:ii u ntââ yinté kópu dpî l:âmo? ⁶ Lukwe díy:o pi ngmê ngê u mbwó kóté tédê dpî núw:o, kuwa pini ngê dp:uu kóté kalê dé.

⁷ Ndêndê ngê nmye kn:aadikn:aadi ngópu. Lukwe díy:o nmye numo kóté kîgha nyédi. Lukwe díy:o yi kópu knî dênmyinê vyîmî tumo. Nmyi mbwó ngmê adí mtíkó knomomê, nangê kóté kwolo, dmyina a vyîmî.^q ⁸ Lukwe díy:o numo p:uu nmye dono nyédi. Lukwe díy:o nmyi chóó nmyi tîdê mbwó yoo yi tpile nmye t:âmot:âmo tumo. ⁹ Mumdo nmyi lama daa tóó, pi dono yoo Chóó Lémi kóó k:oo daamî ghê dmi. Pi knî y:oo kîngê dóó

ⁿ 5:7 Ex 12:21; Njon 1:29; 1 Pita 1:19 ^o 5:8 Ex 12:15 ^p 5:11 2 Tes 3:6; Taitas 3:10;
2 Njon 1:10-11 ^q 6:7 Mát 5:39-40; 1 Tes 5:15

nmyo. Yélini a pyââ ti nyédi, kn:aa yâpwo knî ye a ngêpê nyédi, pi u kuwó a pyuwópyuwó nyédi, ó a numo kpêêpî nyédi, yinté pini Chóó Lémi kóó k:oo daangmamî ghê.^r ¹⁰Kpáápi yoo, núknwe yoo, ndee pyu ndîi yoo, pi u pi dyede pyu yoo, ó nté ndapî yi mb:aami yoo, yinté pini Chóó Lémi kóó k:oo myedaangmamî ghê. ¹¹Knî ngmê yinté kînmyee a ya, ngmênê nmî Lémi Yesu Kédisu ngê nmyi dono kî chedê too, nmî Mî u Ghê Dmi ngê nmyi nuw:o dmi ngmópu, Chóó Lémi ka yoo mb:aa ngê pyódu nmyoo.^s

Pyââ ti mââ ti p:uu kópu

¹²Nmî Lémi Yesu ngê daa dêêpî kópu dyuu mbêmê kamî ngê pyódu nmoo. U l:êê díy:o kópu yilî yi kwódu yé kópu daangma a tóó, ngmênê kópu yilî knî y:oo yoo dpî dyênê t:oo. Yi kópu knî namê d:uud:uu dé. Nyââ, kópu yilî yi kwódu yé kópu daangma a tóó, ngmênê kópu ngmê nmyi kada kîngê ghê. Yesu Kédisu nmyi kada vyílo yichoo kwo. ¹³Nté nmî núknî yi mênê dpî lê, yi l:êê díy:o a tóó, nté u l:êê díy:o nmî núknî a pyede, ngmênê mu dini ghi ngê Chóó Lémi ngê miyó dê wa dyênê dê. Pyââ ti mââ ti daa yinté kópu dé. Nmî Lémi ngê daa pyââ ti mââ ti yi l:êê díy:o a l:âmo nmoo, chóó u l:êê díy:o a l:âmo nmoo, nmî l:êê díy:o mye pwene.^t ¹⁴Chóó Lémi ngê nmî Lémi kpêênî mêtê pyidu ngê, u wêdêwêdê mbêmê yinté amyedê pyidu nmo.^u

¹⁵Mumdoo nmyi lama daa tóó, nmyo Yesu Kédisu kóó kpâlî dé. Lukwe, pi ngmê ngê Yesu u mbyuu pee ngmê téli pyââ u k:i:i ngmîdi ngê wa pyódu? Apuu! Doo u ntââ.^v ¹⁶Mumdoo nmyi lama daa tóó, n:i:i téli pyââ ka dpî lê, u k:i:i ngmîdi ngê dpî pyaa knî. Yi kópu puku yedê mye tóó.^w ¹⁷N:i:i nmî Lémi k:i:i ngmîdi ngê dpî pyaa knî, yi nuw:o dê ngmîdi ngê dpî pyaa knî.

¹⁸Pyââ ti mââ ti vy:o a pwii dmyeno. Kn:aa dono ngmanyi d:uu, ye kn:aa pini ngmanyi dyênê, ngmênê wanmyi pyââ ti, ye nmyi chóochóó wanmyi dyênê t:oo. ¹⁹Nmyi nt:u dmi daa nmyi chóó a pyede, ngmênê Chóó Lémi u Ghê Dmi yi mênê a kwo. Ghéni Dmi n:i:i Chóó Lémi ngê nmye a kpo, nmyo u yâpwo ghi.^x ²⁰Nmyi nt:u dmi daa nmyi chóó nmyi tpile dé, Chóó Lémi ngê kópu ndîi ngmê d:uu ngê, u ngwo pwila nmyoo. Yi kópu u l:êê díy:o nmyi nt:u dmi mb:aamb:aa ngê dmyinê dpodo kîgha dé, Chóó Lémi u pi ndîi ngê u ngwo paa pyaa we.^y

Yéyéé u danêmbum

7 ¹A tîdê mbwó yoo, pwepwee pee yedê póó n:i:i a ka nmyinê dy:ââ ngópu, yi kópu knî yi p:uu nmye nîné d:êê. Yéyéé p:uu mwiyé nmye

^r 6:9-10 Epeso 5:5; Tpyuu 22:15 ^s 6:11 Taitas 3:3-7 ^t 6:13 1 Tes 4:3-5

^u 6:14 Lóma 8:11; 2 Kódin 4:14 ^v 6:15 Lóma 12:5; 1 Kódin 12:27 ^w 6:16 Gen 2:24

^x 6:19 1 Kódin 3:16 ^y 6:20 1 Pita 1:18-19

nînê d:êê. N:ii ngê u yi adî kwo, Nmî Lémi p:uu ntênê nî dpodo, u l:êê dîy:o daawa yéé, yi pini ngê kópu mb:aa dpî d:uu, ²ngmênê yi pini pyââ ti ngê kîngê dyênê. Yi kópu u l:êê dîy:o pi yintómu dny:oo yéyéé.

³Cha cha yi kópu ala. Pyââ u moo ka d:uudpî nganê mb:anê, mââ u kpâm ka myed:uudpî nganê mb:anê. ⁴Pyââ p:uu tpile yilî daa chóó u tpile yilî, u moo u tpile yilî. Myenté, mââ p:uu tpile yilî daa chóó u tpile yilî, u kpâm u tpile yilî. ⁵Numo p:uu wuwu nangê kwódu. Ngmênê, pi cha y:oo u yi y:e adî kwo, Dpodombiy:e ny:oo ngêpê, wo knî ngmê yi k:oo, ye wuwu yi chóó noko dny:oo kwódukwódu, dpodombiy:e u ngwo dny:oo ngêpê. Yi ngêpê u wo knî dny:oon:aa lêpî, ye yi kwódu yé kópu machedê ngê u ngwo choo pyodopyodo. Setan u wépi pwapî nmyi lama dnyinté a tóó. Kîmê dódó nmyo, pi ngê kn:aa pyópu p:uu kêê kîngmê yé.

⁶Kópuni nmye d:a d:êê, nmyenê, Pi yintómu dny:oo yéyééé, daa dêêpî kópu nmye yed:a d:êê. Yi kópu u nt:u ala, n:ii ngê u yi adî kwo, Pyââ ngmênî nya, yini choo yéyééé. ⁷Ngmênê nê nê, a nuw:o alanté, u ya a nga a kwo, Kwodo mgêmî yintómu nê ntee yéli ngê dny:oo ya, kîdnyingê yéyééé. Ngmênê daa pi yintómu u ntââ ngê a pyede. Chóó Lémi ngê woni yoo yéyééé u ntââ mbêmê dpo pyódu té, woni yoo yi mo ya u ntââ mbêmê dpo pyódu té.

⁸Kwodo mgêmî yoo, kuknwe yoo, ala kópu nmye nînê tpapê. Ntee n:aa tóó, yinté myedmyinê ya. ⁹Ngmênê nmyi mo ya doo u ntââ ngê nmye wa pyaa knomomê, ye dmyinê yéyééé. Pyââ ti mââ ti yi l:êê dîy:o kîdnyingê ghiighii mbê dmi.^z

¹⁰Cha cha yoo yi dêêpî kópu m:uu ala, daa a chóó a dêêpî kópu, ngmênê nmî Lémi u dêêpî kópu. Pyââ ngê u moo kîngî kpîpî. ¹¹Wa kpîpî knomomê, ye kn:aa pini ngê kêê p:uu kîngê yé. Yi pyópu u moo ka mēdaawa diyé knomomê, ye u mo choo ya. Myenté, mââ ngê u kpâm kîngê kpîpî.

¹²Cha cha n:ii Yesu u yoo vy:o mu ngmidi ghê wo, woni daa ghê wo, yi yéli yi p:uu nînê danê. (A chóó a dêêpî kópu yinînê tpapê, daa nmî Lémi u dêêpî kópu.) Yesu u yoo vy:o pini n:ii ghê wo, ngmênê u kpâm daa ghê wo, yi pyópu ngê u yi u ngwo adî kwo, Kwodonkwodo ny:oo ya, ye yi pini ngê u kpâm kîngê kpîpî. ¹³Myenté, pyópuni Yesu u yoo vy:o ghê wo, ngmênê u moo daa ghê wo, yi pini ngê u yi u ngwo adî kwo, Kwodonkwodo ny:oo ya, ye yi pyópu ngê u moo kîngê kpîpî. ¹⁴K:omo tpile yi pini Yesu ka daa kélîmî yédi, ngmênê Chóó Lémi ka pi mb:aa ngê dpî pyódu, mu kópu u dîy:o u kpâm k:ii ngmidi ngê a ya nódó, u kpâm Yesu ka a kélîmî yédi. Myenté, k:omo tpile nmî mbwó ngmê u kpâm Yesu ka daa kélîmî yédi, ngmênê Chóó Lémi ka pyââ mb:aa ngê dpî pyódu, mu kópu u dîy:o u moo k:ii ngmidi ngê a ya nódó, u moo Yesu ka a kélîmî

^z 7:9 1 Tim 5:14

yédi. Wo daa yinté, ye nmyi tp:ee dmâádîma Chóó Lémi ka tupwótupwó ngê pê pyede, u nuu u yoo ngê daapídnye kwo. ¹⁵Ngmênê pini n:ii Yesu ka daa kélímí yédi u yi u ngwo adí kwo, U kpâm nê kuwo, ye dpí lee we, nmí tîdê u yéyéé machedê ngê u ngwo wa pyódu. Myenté, pyópuni Yesu ka daa kélímí yédi u yi u ngwo adí kwo, U moo nê kuwo, ye dpí lee we, nmí mbwó u yéyéé machedê ngê u ngwo wa pyódu. Yini dpí lee we, mu kópu u díy:o Chóó Lémi ngê daa dnyepéli u l:êê díy:o a ngmídi nmyoo, u yi u ngwo a kwo, A yoo noko mb:aamb:aa ngê dny:oo ya.^a ¹⁶Nmí tîdê, mumdoo nyi u ntââ, moo u nuw:o anyi ngmêê, nmí Lémi kóo k:oo anyi kââ? Nmí mbwó, mumdoo nyi u ntââ, ngmâm u nuw:o anyi ngmêê, nmí Lémi kóo k:oo anyi kââ?^b

Daa ya ngmêêpí u danêmbum

¹⁷Dini ghi n:ii ngê Chóó Lémi ngê Yesu u yoo vy:o mwo a kaa nmyoo, yi ngwo ntee nmyee a ya, yinté myedmyinê ya, dpodoni íedê nmí Lémi ngê a kaa nmyoo, yi dmyinê dpodo. P:aani p:aani Yesu u yoo kní ye yi dêêpí kópu dyuu yinté ye myinîn:aa tpaê too. ¹⁸Nju pi n:ii Chóó Lémi ngê, Yesu u yoo vy:o dpí kââ, yi pini ngê kîngí vyi, U ya a nga daa kwo, Chóó Lémi u l:ii a p:uu choo ya. N:ii daa Nju pi, Chóó Lémi ngê Yesu u yoo vy:o dpí kââ, yi pini Nju pi ngê chók kîngê pyódu, pi ngê Chóó Lémi u l:ii yi pini p:uu kîngí t:oo. ¹⁹Ala ngwo Chóó Lémi u l:ii t:emí têdê kópu ngê dê pyódu, u dêêpí kópu dyuu chââchââ yi ndîf kópu.^c ²⁰Dini ghi n:ii ngê Chóó Lémi ngê Yesu u yoo vy:o mwo a kaa nmyoo, yi ngwo ntee nmyee a ya, yinté myedmyinê ya. ²¹A mbwó. Dini ghi n:ii ngê Chóó Lémi ngê Yesu u yoo vy:o kaa nyoo, yi ngwo pi ngmê ngê wop doo a dpodo kîgha ngi, ye p:uu chi dpodo, u nuw:onuw:o ngê kêê kîdangê t:oo. Ngmênê n:ii ngê wop a dpodo kîgha ngi, u yi u ngwo adí kwo, Nyi nî pw:ii, ye u kwo nangê nganê mb:anê, choo pw:iipw:ii ngi, nyóó l:êê díy:o anyin:aa dpodo. ²²Pini n:ii pi ngmê ngê wop a dpodo kîgha ngê, dini ghi n:ii ngê nmí Lémi ngê dpo ngmídi, u nuw:o nmí Lémi p:uu dpí ghê. Myenté, ndapí p:uu dpodo pyu n:ii nmí Lémi ngê dpo ngmídi, nmí Lémi p:uu dpodo pyu ngê dpí pyódu, Yesu Kédisu p:uu wop a dpodo yédi.^d ²³Chóó Lémi ngê kópu ndîf ngmê d:uu ngê, u ngwo pwila nmyoo, yi kópu u l:êê díy:o pi kní yi nuw:o u pono kîdmyemê vyápê. ²⁴A tîdê mbwó yoo, dini ghi n:ii ngê Chóó Lémi ngê mwo a ngmídi nmyoo, u k:ii nmyinê kâádí ngópu, yi ngwo ntee nmyee a ya, yinté myedmyinê ya.

Kwodo mgêmi yoo yi kópu

²⁵Kwodo mgêmi yoo yi p:uu kópu u nkwo nmye ngmênîndê tpaê. Daa nmí Lémi u dêêpí kópu nmye yinîndê tpaê, ngmênê yi kópu p:uu a chók

^a 7:15 Lóma 12:18 ^b 7:16 1 Pita 3:1-2 ^c 7:19 Lóma 2:25; Nkal 5:6 ^d 7:22 Epeso 6:6; 1 Pita 2:16

a kópu nmye ngmênînê tpaápê. Doo u ntââ daanî dóó nmyo, mu kópu u dîy:o nmî Lémi ngê a nuw:o u ntââ ngê a pyódu ngê.

²⁶Ala dini ghi ngê dye ghi dono vy:o nmo pyede, u l:êê dîy:o pi ngê u ya kîngê ngmêê. ²⁷N:ii u kpâm a tóó, kîngê kéé. N:ii u kpâm daa tóó, ghêlî k:ii kîngê yéé. ²⁸Ngmênê pini n:ii dpî yéé, daa dono kópu yu d:uu, myenté pyópuni dpî yéé, mye daa dono kópu yu d:uu. Ngmênê u ya a nga daa kwo, Ala dye ghi dono vy:o dono a pyw:ee yó.

²⁹A tîdê mbwó yoo, nmî Lémi ngê dini ghi n:ii yó, daa kêmakêma a dyimêdyimê. Yi kópu u l:êê dîy:o nmî nuw:o dmi dyámê u kópu knî yi p:uu kîngmê kwo. Yéé u nuw:o u kpâm p:uu kîngmê kwo, nmî Lémi p:uu choo kwo. ³⁰N:ii u pi u l:êê dîy:o a mbê, u nuw:o modo dyé ngê, nmî Lémi p:uu dpî kaa ngê. N:ii knî y:oo w:aa da pyw:ee ngmê, yi kópu mu ngmidi p:uu yi nuw:o dmi kîngê kwo, nmî Lémi p:uu dny:oo nuw:o. N:ii knî y:oo yi tpile dpî pwila t:oo, yi tpile knî yi p:uu yi nuw:o dmi kîngê kwo, nmî Lémi p:uu dny:oo nuw:o. ³¹Dyámê u kópu knî yi p:uu nmî nuw:o dmi kîngê kwo, nmî Lémi p:uu dny:oo kwo, mu kópu u dîy:o yi kópu yilî yintómu daa dye ghi daadîf adnyi ya, nmî Lémi ngê wa ngmêê té.^e

³²U ya a nga daa kwo, Nmyi nuw:onuw:o u kópu dyuu ndîf kópu ngê nmye pyaa dniye. Pi mgêmî u nuw:o ngmidi ngê a ya yédi, nmî Lémi p:uu a dpodo yédi, u nuw:o nmî Lémi p:uu a kwo yédi, ³³u yi u ngwo a kwo yédi, U nuu u kópu nî d:uud:uu dé. Ngmênê yéé u nuw:o miyó ngê a ya yédi. Nmî Lémi p:uu a nuw:o yédi, ngmênê dyámê u kópu knî yi p:uu mye nuw:o yédi, u yi u ngwo a kwo yédi, U kpâm u nuu u kópu yinî d:uud:uu dé. ³⁴Kwodo mye yinté, nmî Lémi p:uu a dpodo yédi, u yi u ngwo daa kwo yédi, U nuw:o kn:aa lee we, u yi u ngwo myedaa kwo yédi, U nt:u kn:aa pini ka nî y:oo. Ngmênê yepe dyámê u kópu knî yi p:uu a nuw:o yédi, mu kópu u dîy:o u yi u ngwo a kwo yédi, U moo u nuu u kópu yinî d:uud:uu dé.

³⁵Yi kópu nmye d:a vyi té, mu kópu u dîy:o u ya a nga a kwo, Mb:aamb:aa ngê pèdmyinê ya. Yééyéé nmye dînf kwódukwódu, ngmênê u ya a nga a kwo, Nmyi nuw:o dmi nmî Lémi mu ngmidi p:uu dny:oo kwo, kn:aa kîdnyingê kwo, mb:aamb:aa ngê p:uu dmyinê dpodo.

³⁶Pini n:ii u yémî p:uu a kwo, ghêlî k:ii daawa yéé knomomê, nmî Lémi p:uu dpodombiy:e adîn:aa dpodo, ye yi pini ngê maa mb:aa ye kîgha ngê. Ngmênê u kuwó dini ghi ngê u nuw:o u kwo ayimênê diyé, awo, A yémî p:uu pyââwe ngê a pyodopyodo, nanê wa nya, u yi u ngwo adî kwo, Nî nya, ye dpî nya ngê, daa kópu dono ayi d:uu. ³⁷Ngmênê yi pini ngê chóó wa vyi, Daanî yéé, a mo anî ya, pwopwo u dî, ye yinté choo ya. U lama adî ya, A nuw:o ngê daawa dóó nê. Yi pini u mo choo ya, kîngê yéé.

³⁸A tîdê mbwó yoo, n:ii ngê u yémî p:uu dpî nya, kópu mb:aa yu d:uu,

^e 7:31 1 Njon 2:17

n:ii u mo a ya yédi, kópu mb:aa mye d:uud:uu ngê, k:uuchêm u kópu ye d:uud:uu ngê.

Yepe yoo yi kópu

³⁹Yepeni u moo a tóó, kn:aa pini p:uu kîngê nuw:o, ngmênê u moo wa pw:oo knomomê, ye u ntââ amê yéé. Pyópuni Yesu u yoo vy:o a kwo, kuwa pini ngê kîngí nya.^f ⁴⁰Ngmênê yi pyópu daawa yéé knomomê, ye mb:aamb:aa ngê adí ya. K:omo tpile nmyi kada pini woni yoo yi nuw:o dmi daa yinté dé, ngmênê Chóó Lémi u Ghê Dmi a mênê mye tóó, u l:êê dîy:o yi kópu nmye d:a vyi.

Tpile tp:oo n:ii k:omo yâpwo ka a yémî ngópu, u pîpî p:uu danêmbum

8 ¹A tídê mbwó yoo, pweepwee pee yedê póó n:ii a ka nmyinê dy:ââ ngópu, myomoni kópu p:uu nmye nînê d:êê, tpile tp:oo n:ii k:omo yâpwo ka a yémî ngópu, u pîpî p:uu. Nmî lama ka tóó, K:omo yâpwo daa ndêndê ngê yâpwo njini, u l:êê dîy:o nmî vy:o pi ngmê knî y:oo yinté tpile tp:oo mbyuu ka a pîpî tumo, yinê ye u kópu daa tóó. Ngmênê pi woni knî ye kwódu ye u kópu, yi tpile tp:oo mbyuu d:uudpî ma ngmê. A tídê mbwó yoo, n:ii yoo yi lama yinté a tóó, apu, K:omo yâpwo daa yâpwo njini, yi yéli daadnya a mbodo ndîf mbodo ndîf, wo yéli yi pi dmi daadnya a dyede. Nmyi nuu ghi dmi numo nódo dny:oo ya, nmyi mbwó yoo yi pi dmi namê dyede. N:ii nódo u tídê mbwó yoo yi nuu ghi dmi a pyede, yi gha dmi a wêdêwêdê kîgha too. ²Pini n:ii ngmênê u kwo kópu yilí yintómu u lama a pyede, yi pini dnyinté a nuw:o yédi, ³ngmênê n:ii nódo Chóó Lémi u nuu ghi a tóó, Chóó Lémi u lama pini, kóó kuwa daamí kââ.^g

⁴Dini ghi n:ii ngê kuwa pini ngmê ngê tpile tp:oo dpî vy:a, k:omo yâpwo u pi u ngwo dpî vyi, u ntââ yi tpile tp:oo mbyuu anmî ma, mu kópu u dîy:o nmî lama ka tóó k:omo yâpwo daa yâpwo ndêndê, Chóó Lémi mu ngmídi yi yâpwo ndêndê. ⁵⁻⁶K:omo tpile pi knî y:oo yâpwo yilí a cháâcháâ tumo, ngmênê nmînê nmo yâpwo mu ngmídi ndêndê, Chóó Lémi. Yi pini nmî Mî, tpile yilí yintómu yinê l:âmo too, u l:êê dîy:o nmo pyede. K:omo tpile yoo yi lémi yilí, a cháâcháâ tumo, ngmênê nmî Lémi ndêndê mu ngmídi, Yesu Kédisu, pini n:ii Chóó Lémi k:ii dyámê pê l:âmo ngópu, ghê kamî nmo yinê myedê kpo.^h

⁷Ngmênê pi woni knî yi lama yi kópu dnyinté a tóó. Yesu u yoo vy:o ghêlí k:ii daa ghê dniye, m:ââ yilí yi k:oo k:omo yâpwo knî ye dnyimo a ngêpê, k:omo yâpwo knî yi l:êê dîy:o tpile tp:oo kpêê ngê dnyimo a yiyé dé, mbyuu dnyimo a pîpî dé. Ngmênê ala ngwo yinté ntini daa pîpî tumo. Yinê ye k:omo yâpwo u pi p:uu a t:a, apu, Chóó Lémi ka tupwótupwó

^f 7:39 Lóma 7:2-3; 2 Kódin 6:14 ^g 8:3 Njon 14:23 ^h 8:5-6 Epeso 4:6; Njon 1:3

ngê angmanmî pyódu. ⁸Daa nté u l:êê díy:o Chóó Lémi ka yoo mb:aa ngê anmî pyaa dmi. N:ii ngê yi ntini dpî kpîpî, Chóó Lémi ka dono ngê d:uudpî pyódu. Myenté, n:ii ngê yi ntini dpî ma, yi kópu mbêmê Chóó Lémi ka pi mb:aa ngê d:uudpî pyódu. ⁹A mbwó, lama ka tóó, k:omo yâpwo dé daa yâpwo ndêndê dé, u l:êê díy:o yinté ntini nye pîpî too. Nga u ntââ, ngmênê ñîdê mbwó yoo yi p:uu chi nuw:o. Pini n:ii u lama yi kópu dnyinté a tóó, nangê lvêêdí.ⁱ ¹⁰K:omo yâpwo u ngomo k:oo kmaapî tédê nangmê nî. Yinté pini ngê y:i wa m:uu ngi, yi ntini pee my:oowa ma, ngmênê u kwo dono kópu ayi d:uu, chóóchóó nmî Lémi u yoo kuwa wa ghê. ¹¹Kópuni lama a tóó u l:êê díy:o lukwe díy:o mwó anyiné lvêêdí. Yi pini u l:êê díy:o nmî Lémi Yesu Kédisu pwene. ¹²Lukwe díy:o nmî Lémi Yesu Kédisu p:uu anyi dono, pini n:ii u l:êê díy:o pwene anyiné lvêêdí, mwó yoo yi p:uu am:ii dono, yi nuw:o dmi anyi dyênê. ¹³Nê nê a nuw:o alanté. Ntini n:ii ngê a mbwó wa a lvêêdí, yi ntini mēdaanî ma, u dí pwoopwo. U ya a nga daa kwo, A mbwó a l:êê díy:o ngma a lvêêdí we.^j

Kópuni dyuu yi wépi dmi Póól ngê puwá

9 ¹A tidê mbwó yoo, u ya a nga daa kwo, A l:êê díy:o pi ngma a lvêêdí we. Dyimê pywuu nmye ngmênîné kuwo. K:omo tpile u ntââ ndapî nmye p:aa dmy:ee ngê, ngmênê nmye dîp:ê dmy:ee ngê. K:omo tpile kópu yilî yi kwódu ye kópu daangma a tóó, ngmênê woni knî yi wépi dmi a chóó nî puwá. K:omo tpile nmî Lémi Yesu a chóó a ngwolo dé y:oo nî módu, u dyépi ngê u ngwo a pyódu noo, ngmênê tpile nmye dînî dmyinê ngê. K:omo tpile nmî Lémi u yoo vy:o a chóó nî kaa nmyoo, ngmênê tpile nmye dînî dmyinê ngê.^k ²K:omo tpile pi woni knî ye yinê ye d:aa Yesu u dyépi ngmê, ngmênê nmyinê nmye nê u dyépi ngmê, mu kópu u díy:o u yoo vy:o a chóó nî kaa nmyoo.^l ³Yi kópu pi knî ye n:aa tpaépê ngê, yélini y:oo a pi a dyede ngópu.

⁴A tidê mbwó yoo, yélini yi l:êê díy:o n:aa dpodo yédi, mumdoo doo u ntââ nté mbwaa ye daanî dmyinê dé? U ntââ, ngmênê ye dînî dmyinê doo, a chóó a kêê dé y:oo n:aa dpodo yédi, ndapî u ngwo n:aa kmênêkmênê ngê. ⁵A kpâm wo tóó, u ntââ p:aa y:eñey:eñe, yoo nye pîdnya a vuyuwo. Dyépi woni yoo, Pita u k:ii, nmî Lémi u mbwó yoo nye yi k:ii, yi kpâm yoo a y:eñey:eñe tumo, yoo yi ntépîná knî yi k:oo a kmaapî nyédi. ⁶Mbanapas k:ii nyo miyó njini nyi chóó nyi kêê dé y:oo nye dpodo nódó, nyi ndapî u ngwo nye kmênêkmênê ngê, ndapî nmye dēnyipu dmyinê. ⁷Mumdoo lede knî y:oo yi kaa taa kpîdí yi chóó yi ndapî ngê dpî pwila t:oo? Kêle, yi kada pini ngê yinê dpî pwila té, ye dpî y:ee té. Mumdoo n:ii ngê yâpwo tédê dpî yé, nté y:i d:uudpî ma? Kêle, y:i a kmaapî yédi. Mumdoo n:ii u sipi w:uu a kwo yédi, módó ye a vuyuwo

ⁱ 8:9-11 Lóma 14:13-15 ^j 8:13 Lóma 14:21 ^k 9:1 Dpodo 26:16 ^l 9:2 2 Kódin 3:2-3

yédi? Mye yinté, yélini yi vy:o n:aa dpodo yédi, u ntââ yi ntépînâ knî yi k:oo anî kmaapî, ndapî ye amy:aa dmyinê. ⁸Daa a mo dí vyi, ngmênê yinté kópu puku yedê mye tóó. ⁹Mósisî ngê ala dêêpî kópu a d:êê ngê,

N:iî ngê u pudumakó choo dpodo kîgha,
komo kîngê kudu.

Choo dpodo, choo kmaapî.

Mumdoo Chóó Lémi pudumakó knî yi p:uu doo a danê?^m ¹⁰Mumdoo daa nmî p:uu doo a danê? Ndêndê ngê nmî p:uu doo a d:êê. Yélini wunê n:êê nyédi, yélini wumê nté mgîpî nyédi, daa módó a dpodo nyédi. Yi lama a tóó, Kwéli nmo dpodo té, díyo y:i anmî kmaapî. ¹¹Nmyo a yâpwo tédê kamî, nté woo n:uu kaa too, mumdoo doo u ntââ nt:u daangmanî ma?ⁿ ¹²N:iî knî y:oo wunê ndiye kîgha nmyoo, nmyi ntépînâ knî yi k:oo a kmaapî nyédi, mumdoo doo u ntââ yinté kópu a nga daanmyi d:uu ngmê? Ngmênê a chóó tpile nmye dîp:êngmê dmy:ee ngê. Kópu yilî yintómu noo a vyîmî dé, mu kópu u díy:o u ya a nga dêpwo kwo pi ngmênê lvêêdî. U ya a nga myedêpwo kwo, Pi ngmê ngê Yesu Kédisu u kópu mb:aa u wépi pwaa ngê.

¹³Nmyi lama ka tóó, kpêê yiyé pyu knî y:oo yi nté yi dpodo tédê a kmênêkmênê ngópu.^o ¹⁴Myenté, nmî Lémi ngê apê, N:iî knî y:oo a kópu mb:aa pi knî ye adnyin:aa tpaê, yi nté y:i dny:oon:aa kmênêkmênê.^p ¹⁵Ngmênê tpile nmye dîp:êngmê dmy:ee ngê, ala pweepwee pee yedê ala ngwo nmye myedînî dmyinê. K:omo tpile dómudómu tédê amy:aa pw:onu, ngmênê pi knî ye nté ndapî daanî dmy:ee dé. Pi knî ye n:aa tpaê ngê, yenîmo, A chóó a ndapî a kêê dé y:oo n:aa kmênêkmênê ngê. Yi kópu k:omodanê kópu ngê ye kîngî pyódu, u l:êê díy:o ndapî ye dînî dmyinê ngê. ¹⁶Yi kópu u díy:o a gha mb:aamb:aa ngê dpî pyódu, nmî Lémi u kópu dyuu pi knî ye módó n:aa tpaê ngê. Doo u ntââ nmî Lémi u wépi daanê puwâ. Yi dpodo íedê a kaa noo. Yi dpodo daanî dódó knomomê, ye nmî Lémi ngê dnyinté daawa kpada nê. ¹⁷A chóó a nuw:o ngê wonî dpodo, ye a pywuu pênîné ngêêpî, ngmênê nmî Lémi ngê módó a dpodo kalê noo, doo u ntââ yi dpodo u wépi daanî puwâ. ¹⁸A pywuu n:iî nîné ngêêpî ngê, alanté a tóó, a gha mb:aamb:aa ngê dpî pyódu. K:omo tpile yoo yi ntépînâ k:oo p:aa kmaapî, ngmênê yi kópu u wépi nî puwâ, nmî Lémi u kópu dyuu módó ye n:aa tpaê ngê, a gha mb:aamb:aa ngê u ngwo dpî pyódu.

Kópuni u l:êê díy:o Póól ngê u l:êê ghi dmi dpîmo ngmêêpî dé

¹⁹Doo u ntââ pi ngê daadî dpodo kîgha nê, ngmênê pi dyêêdî yintómu yi p:uu wop n:aa dpodo yédi, mu kópu u díy:o pi yilî nmî Lémi Yesu u yoo vy:o paa ghê dniye. ²⁰Dini ghi n:iî ngê Nju tpémi yi vy:o nîmo kwo

^m 9:9 Deut 25:4; 1 Tim 5:18 ⁿ 9:11 Lóma 15:27 ^o 9:13 Deut 18:1-3 ^p 9:14 Mát 10:10; Nkal 6:6

yédi, kópuni a d:uud:uu tumo, myinê d:uud:uu too, mu kópu u díy:o nmí Lémi Yesu ka paa kêlímí mbê dniye. K:omo tpile daa Mósisi u dêêpí kópu dyuu mbêmê nmí Lémi ngê wa ngee nmo, ngmênê Nju tpémi yi vy:o yi dêêpí kópu dyuu myiní chââchââ ngê, mu kópu u díy:o u ya a nga daa kwo, Pi ngmê a p:uu pêdê lvêédí we. ²¹ Myenté, dini ghi n:ii ngê kn:aa yéli yi vy:o nîmo kwo yédi, kópuni a d:uud:uu tumo, myiní d:uud:uu too, mu kópu u díy:o nmí Lémi Yesu ka paa kêlímí mbê dniye. Yi yéli y:oo Mósisi u dêêpí kópu dyuu daa chââchââ tumo, yi vy:o myedín:n:aa chââchââ too, mu kópu u díy:o mywene ye daapaa ghê we, a wépi daapaa pwaa y:e. (Chóó Lémi u dêêpí kópu dyuu dípí kée ngê, nmí Lémi Yesu Kédisu u dêêpí kópu dyuu vyílo yiní chââchââ ngê.) ²² Yélini Yesu ka yimi doongê kêlímí mbê dniye, yi yéli yi vy:o kyedekyede n:aa m:ii yédi, u ya a nga daa kwo, Ngmêní lvêédí. U ya a nga a kwo, Nmí Lémi Yesu ka dpodombiy:e pídný:oo kêlímí. Yi pi dyêédí kní yi vy:o yinté pini ngê myinê pyodopyodo yédi, mu kópu u díy:o nmí Lémi Yesu ka kní ngmê paa kêlímí mbê we.

²³ Yi kópu yilí n:aa d:uud:uu too, mu kópu u díy:o nmí Lémi ngê u kópu mbêmê kóó k:oo paa kaa téne, kóó k:oo myepaa kaa nêne. Dpodombiy:e n:aa dpodo yédi, mu kópu u díy:o nmí Lémi ngê wa a kuwo nê. ²⁴ Dyimê pywuu nmye ngmênínê kuwo. Mbêpê tédê, pi yilí a mbêpê nyédi, ngmênê ngmidi kada dp:uu ghê. Dpodombiy:e dmyinê mbêpê, kada paa ghê dmyeno.^q ²⁵ Mbêpê pyu yoo ghêlî daa mbêpê nyédi, dpodombiy:e mwiyé wunê ndiye nyédi, daa núknweńuknwe nyédi, daa mbwaa ndanî nyédi, u yi y:e a kwo yédi, Kada nmí mbêpê. N:ii kada dp:uu ghê, k:omo tpile pi kní y:oo yi pini u pi mēdaa nyepēnyepē ngópu, ngmênê dpodombiy:e a mbêpê nyédi. Kópuni u l:êê díy:o nmo mbêpê té, chedê ngê daawa pyódu.^r ²⁶ Yi kópu u l:êê díy:o dpodombiy:e n:aa mbêpê, u ya a nga a kwo, Kada n:uu ghê. Pini n:ii dê a l:êê nódó, nê yinté pini ngmê. Pini n:ii n:aa vyee ngê, díní kn:aadikn:aadi ngê, dpodombiy:e n:aa vyee ngê. ²⁷ A nt:u n:aa dpodo kîgha ngê, núknweńuknwe u kwo n:aa kwódukwódu ngê, mu kópu u díy:o pi mgee ngê aní pyódu knomomê, k:omo tpile yoo woni a chóó nê danê too, ngmênê nmí Lémi ngê kuwa wa kaa nê.

Lvêédílvêédí u dyimê pywuu dé

10 ¹ A tîdê mbwó yoo, n:ii ngê apu, Mb:aamb:aa ngê n:aa m:ii, ngwolo dê mb:aamb:aa ngê dny:oo kwo, kîdangê lvêédí. Nmí kn:ââ yoo ntee a lvêédí dniye, yinté kîdmyengê lvêédí dmi. Dini ghi n:ii ngê Mósisi ngê Yichip u mênê a pw:ii too, nkalí too pee yidnya a yâmuyâmu, Ntii Mtyemtye u ngwo a ngmêê ngópu.^s ² Pi kní y:oo ntee

^q 9:24 Pilipay 3:14; 2 Tim 4:7-8 ^r 9:25 2 Tim 2:4-5; Njems 1:12 ^s 10:1 Ex 13:21-22; 14:22-29

mbápitísím kalê nmoo, Yesu u yoo vy:o u ngwo kaa nmoo, mye yinté, dini ghi n:ii ngê nmî kn:ââ knî y:oo nkalí too pee dnja a yâmuyâmu, Ntii Mtyemtye u ngwo a ngmêê ngópu, Mósisi u yâmuyâmu pyu ngê u ngwo a pyaa dniye. ³Yâpwo nté ntee nmo pîpî ngê, mye yinté, Chóó Lémi ngê nmî kn:ââ knî ye yi nté dpîmo a dyede, pi yintómu knî y:oo yi ntini dnyimo a pîpî. ⁴Yâpwo wain ntee nmo ndanî ngê, nmî Lémi Yesu Kédisu u wêdêwêdê mbêmê Mósisi ngê mbwaa yinté ye myedpîmo a yémî. Daa ng:êêntómu Mósisi ngê u kiyé t:aanî u mênê dpîmo a dêêdêê, nmî Lémi ngê mbwaa u ngwo ye dpîmo a yémî. Yi t:aanî Yesu Kédisu ngê doo ya. ⁵K:omo tpile nmî Lémi ngê pi yintómu knî yi l:êê dîy:o yi kópu knî dpîmo a d:uud:uu dé, ngmênê yilí knî y:oo daa Chóó Lémi u nuu u kópu yidnya a d:uud:uu dé, yi yéli maa p:uu a pw:oo dniye. ⁶Kópuni y:e a pyodo, p:uu dmyinê nuw:o, yi nt:anê nangmê yââ. U yi y:e doo a kwo, Kópu dono nmî d:uud:uu dé. Yinté kópu nangmê d:uu. ⁷K:omo yâpwo ngma a l:âmo ngópu, u kwo dnja a ngêpê. Puku yedê alanté a tóó,

Nipi dnje kmaapî, nipi dnje mbwaa ndanî, nipi myednye ndens. ⁸

Yinté kópu nangmê d:uu. ⁸Ntee dnyimo a pyââ ti mââ ti, yinté kópu ngê kêê nangê t:oo. Wo ngmê ngê pyââ ti têdê pi my:oo yono yono yono y:a mê pyolo yono yono y:a (23,000) a pw:oo dniye. ⁹Nmî Lémi u tókótókó ngê kêê nangê t:oo. Dini ghi n:ii ngê dnyimo a tókótókó, tpile pê yilí knî y:oo dnyimo a kiyekiye dé, pi yilí u ngwo pw:oo dniye. ¹⁰Nmî Lémi p:uu nuu mbumu ngê kêê nangê t:oo. Dini ghi n:ii ngê nmî kn:ââ yoo nmî Lémi p:uu dnja a nuu mbumu, yi ngwo enjel ngmê dy:ââ ngê, yinê vya too. ¹¹

Kópuni y:e a pyaa dniye, yi p:uu dmyinê nuw:o, nmî l:êê dîy:o dyimê pywuu ngê a pyede. Kuwókuwó wéni daa kêmakêma a dyimêdyimê, yinté dono kópu nangmê d:uu. ¹²N:ii ngê apu, Mb:aamb:aa ngê n:aa m:ii, ngwolo dê mb:aamb:aa ngê dny:oo kwo, kîdangê lvêêdî. ¹³N:ii wa lvêêdî knomomê, chóó kn:ââ. Setan ngê ntee a dódó nmyoo, pi yintómu yinté mye dódó too. Nmyi dódó têdê Chóó Lémi ngê daawa a kuwo nmyo, dpî ngee nmyo, Setan ka dpî kwódu, doo u ntââ dpodombiy:e d:uudpî dóó nmyo. Nyââ, nmî Lémi ngê dpî ngee nmo, nmî tókótókó ndîi têdê dpî dyé nmo. ¹⁴

Póól ngê k:omo yâpwo knî ye ngêpê u ngwo ye kwódu ngê

¹⁴A tîdê mbwó yoo, Setan ngê kîdangê lvêêdî nmyo. Nmyi nuu ghi dmi a nódó ka tóó, u l:êê dîy:o nîné kwunokwuno nmyo, k:omo yâpwo knî ye ngêpê têdê yi nkîgh:ê nangmê nî. ¹⁵Nmyi nuw:o knî yi mbêmê

^t 10:3 Ex 16:35 ^u 10:4 Ex 17:6 ^v 10:5 Num 14:26-30; Hipîlu 3:17 ^w 10:7 Ex 32:6
^x 10:8 Num 25:1-2 ^y 10:9 Num 21:5-6 ^z 10:10 Num 16:41-49 ^a 10:13 Hipîlu 4:15

nmyo m:ii nyédi, ala kópu p:uu mb:aamb:aa ngê dmyinê nuw:o. ¹⁶Dini ghi n:ii ngê nipi nmînê wuwó ngê, wain d:âa u l:êê dîy:o Chóó Lémi nmo kwunokwuno ngê, nmo ndanî ngê, yi ngwo nmî Lémi Yesu Kédisu u wêê ngê Chóó Lémi ka dpo kââdî nmo. Dini ghi n:ii ngê mbîdédi nmo pwapî ngê, nmo pîpî ngê, nmî Lémi Yesu Kédisu ngê ngmîdi ngê dpî pyódu nmo, u nt:u ngê myoo pyódu nmo.^b ¹⁷K:omo tpile nmo yilî, ngmênê ngmîdi ngê nmo pyodopyodo nyédi, mu kópu u dîy:o mbîdédi mu ngmîdi yinmo pîpî ngê.^c ¹⁸Yisîléli tpémi yi p:uu ngî nuw:o mbê dmyeno. Yélini kpêê ziyé tédê nipi a kmaapî nyédi, Chóó Lémi u k:ii ngmîdi ngê dpî pyaa dmi.

¹⁹Kópu m:uu ala, p:uu dmyinê nuw:o. K:omo yâpwo dé daa yâpwo ndêndê dé, tpile tp:oo n:ii yi l:êê dîy:o a vyee tumo, yi mbyuu tupwótupwó ngê d:uudpî pyódu.^d ²⁰Ngmênê yélini k:omo yâpwo knî ye a kpêê ziyé nyédi, daa Chóó Lémi ka a ngêpê nyédi, Setan u enjel ngmê ka a ngêpê nyédi. Yélini yi kpêê ziyé tédê nipi a kmaapî nyédi, Setan u enjel u k:ii ngmîdi ngê dpî pyaa dmi. U ya a nga daa kwo, Setan u yoo vy:o ghê dmyeno.^e ²¹Doo u ntââ nmî Lémi u k:ii ngmîdi ngê daanmyi ya, Setan u enjel u k:ii ngmîdi ngê myedaanmyi ya. N:ii Setan u enjel yoo yi k:ii a kmaapî nyédi, doo u ntââ nmî Lémi u k:ii mēdaa kmaapî nyédi.^f ²²Mumdoo nmyi lama daa tóó, nmo nmî Lémi u kpâm ntee tpile dé, kn:aa pini ka wanmyi lee dmi, nmî Lémi nmyi l:êê dîy:o adî k:uundêpî. Nangê vyi, U wêdêwêdê tédê, daawa kpada nmo. Nmyi lama daa tóó, dnyinté daawa kpada nmyo.

²³Kópu yilî yi kwódu ziyé kópu daangma a tóó, ngmênê kópu yilî knî y:oo yoo dpî dyênê t:oo. Yi kópu knî namê d:uud:uu dé. Nyââ, kópu yilî yi kwódu ziyé kópu daangma a tóó, ngmênê kópu woni knî y:oo yoo yi gha dmi daa wêdêwêdê kîgha tumo. ²⁴Daa nmyi chóó nmyi kópu knî yi p:uu dmyinê nuw:o, ngmênê nmyi tîdê mbwó knî ye dmyinê vyyuwo.^g

²⁵Tpile tp:oo mbyuu n:ii nté pywupwi tédê anmyi mumu dé, dmyinê pywupwi dé, myedmyinê pîpî dé. Yi kópu daa tóó. Yi p:uu kîdmyinêngê nuw:o,^h ²⁶mu kópu u dîy:o ala kópu puku yedê a tóó, apê,

Dyámê mbêmê tpile yintómu nmî Lémi u nêni dé.ⁱ

²⁷Kuwa pini ngmê ngê kmaapî tédê wa dóó kalé nmyo, u yi nmye adî kwo knomomê, Yi nmî lee dmi, ye y:i dmyinê lèpî, ntini n:ii nmyi ngîma adî yé, dmyinê pîpî. U kópu daa tóó, p:uu nuw:o ngê kêê nangê t:oo. ²⁸Ngmênê pi ngmê ngê nmye dî vyi knomomê, Kî tpile tp:oo mbyuu nangê ma, k:omo yâpwo ka kpêê ngê dê yé ngmê, ye yi ntini nangmê ma. ²⁹N:ii ngê yi kópu nmye wa vyi, yi pini u kélîmî u l:êê dîy:o yi ntini u wépi dpî pwaa yó, nangê ma. Daa nmyi chóó nmyi kélîmî u l:êê dîy:o yi kópu nmye d:a d:êê.

^b 10:16 Mát 26:26-28 ^c 10:17 Lóma 12:5; Epeso 4:16 ^d 10:19 1 Kódin 8:4

^e 10:20 Tpyuu 9:20 ^f 10:21 2 Kódin 6:15-16 ^g 10:24 Lóma 15:2

^h 10:25-29 1 Kódin 8:4-13 ⁱ 10:26 Psalm 24:1

Ala kópu a ka wanmyi vyi knomomê, a ka nye, Lukwe dîy:o pi ngmê ngê chóó u nuw:o mbêmê yi kópu nmo wa kwódu? ³⁰A ka nye, Ntini n:ii u l:êê dîy:o Chóó Lémi nmo kwunokwuno ngê, doo u ntââ pi ngê yi ntini nmo daadî kwódukwódu. ³¹A tîdê mbwó yoo, ntini n:ii nmye pîpî ngópu, mbwáani n:ii nmye ndanî ngópu, kópuni nmye d:uud:uu tumo, daa nmyi chóó nmyi nuw:o mbêmê dmyinê d:uud:uu dé, ngmênê alanté dmyinê nuw:o, apii, Kópuni u l:êê dîy:o Chóó Lémi u pi ndî ngê wa pyódu, yi kópu nmo d:uud:uu.^j ³²Pi nangmê lvêêdî. Nju tpémi yi maa dmi nangê nkoko, kn:aa yéli yi maa dmi myenangê nkoko. Yélini nmî Lémi u yoo vy:o a wee, kn:aa máádi p:uu nangmê kââ.^k ³³Ntee n:aa m:ii, yinté myedmyinê m:ii. Kópu yilí yintómu daa a chóó a l:êê dîy:o n:aa d:uud:uu too, ngmênê yoo yi l:êê dîy:o n:aa nuw:o yédi, u ya a nga a kwo, Pi yilí nmî Lémi kóó k:oo paa ghê dniye. Nmî Lémi Yesu Kédisu p:uu ntee nîné mtyîmwe ngêêpî, yinté a p:uu myedmyina a mtyîmwe ngêêpî.^l

Pyââ mbodo mââ, mââ mbodo Yesu

11 ¹⁻²A tîdê mbwó yoo, mw:ââkó, nîné kwunokwuno nmyo, mu kópu u dîy:o a kópu dyuu nmyi nuwo doongê kuwo wo, myenté nmî Lémi u yoo yi l:êê ghi dmi n:ii nmye nê núwo too, dye ghi yintómu nmye d:uud:uu tumo. ³Ngmênê u ya a nga a kwo, Ala kópu nmyi lama ntênê choo a ya, pyââ mbodo mââ, mââ mbodo Yesu Kédisu, Yesu Kédisu mbodo Chóó Lémi. ⁴Nmyi lama ka tóó, Kídiki tpémi yi vy:o, pyââ yoo dini ghi n:ii ngê a ngêpê nyédi, kpídî pee yi mbêmê a ya nyédi. Yi kópu u nt:u kópu alanté, yi pyópu knî y:oo yi moo knî yi dnye dmi mb:aamb:aa ngê a nyémî tumo. Ngmênê mââ n:ii ngê ngêpê dpî dóó, ó Chóó Lémi u komo dpî kââ, kpídî pee mbêmê d:uudpî yé, mu kópu u dîy:o u mbodo mu ngmídi Yesu Kédisu, kn:aa pini ngmê doo u mbodo. ⁵Myenté, pyópu n:ii ngê ngêpê dpî dóó, ó Chóó Lémi u komo dpî kââ, kpídî pee mbêmê dpî yé, u nt:u kópu, u mbodo u moo. Yi kpídî pee mbêmê d:uudpî yé knomomê, ye u moo dpî mywenemywene kwolo. Yepeni u tumu mââ dpo pywáí, yi pyópu mbodo ntee dpo vyi ngmê, mywene u ngwo dpî ghê, mye yinté, pyópu n:ii ngê ngêpê módó dpî dóó, kpídî pee mbêmê daa ya yédi, yi pyópu u moo ngê mywene yinté myoo ghê. ⁶Pyópu n:ii ngê yi kpídî pee mbêmê daadî yé, mbodo chóó choo a vyi, mywene d:ud:umbiy:e u ngwo paa ghê we. Yi pyópu ngê u yi u ngwo daadî kwo knomomê, A mbodo a chápwo y:e, mywene a nga ghê we, ye yi pyópu ngê kpídî pee mbêmê choo yiyé. ⁷Mââ ngê kpídî pee mbêmê d:uudpî yé, mu kópu u dîy:o Chóó Lémi ngê tpile yintómu ntee wunê y:enê té, mââ ngê u kpâm ghee knî yinté mye y:enê too. Myenté, mââ u l:êê ghi dmi ntee a pyede, u kpâm u l:êê ghi dmi yinté myedny:oo ya,^m ⁸mu kópu u dîy:o mwiyémiyí

j 10:31 Kílosa 3:17 k 10:32 Lóma 14:13 l 10:33 1 Kódin 9:20-22 m 11:7 Gen 1:26-27

dini ghi ngê pyââ ngê mââ mwiyé daa tpyó, ngmênê Chóó Lémi ngê mââ podo ngma a y:ângo, pyââ u ngwo l:âmo ngê.ⁿ ⁹Myenté, daa pyââ u l:êê dîy:o mââ l:âmo ngê, ngmênê mââ u l:êê dîy:o pyââ l:âmo ngê.^o ¹⁰Yi kópu u l:êê dîy:o pyââ knî y:oo yi moo yoo yi dnye dmi dny:oo nyêmî dé, u l:ii yi p:uu myechoo ya. Enjel knî y:oo yi kópu yi p:uu paa m:uu y:e, nmî Lémi u ngwo paa chaa kalê y:e. ¹¹Ngmênê nmî Lémi u yoo vy:o nipi nmo wee, mââ yoo daa nmî chóó nmo pyede, pyââ yoo myedaa yi chóó a pyede, numo ka nmo vyuwo té. ¹²Myenté mwiyé mwiyé dini ghi ngê Chóó Lémi ngê mââ podo a y:ângo, pyââ u ngwo l:âmo ngê, ala ngwo pyââ ngê mââ yinê dpî tpyé. Chóó Lémi ngê chóó yinté pyódu ngê.

¹³Yi kópu p:uu ntênê dmyinê a nuw:o. Mumdoo nmyinê nmye u ntââ, pyââ módó choo kwo, Chóó Lémi ka u ngwo choo ngêpê? ¹⁴Pi yintómu yi lama alanté a tóó, pini n:ii ngê u mbodo d:uudpo chápwo, mywene u ngwo dpî ghê, ¹⁵ngmênê mbodo gh:aa dmi ndîî ngê pyââ dpo nâmo, u mbodo nm:ââ ngê a ya yédi. ¹⁶Nmyi vy:o pini ngmê yi kópu p:uu adî kwopwepe, yi pini ngê ala kópu dpî ny:ee ngê, Yesu u yoo dyámê wope wope yi l:êê ghi mu ngmîdi, pyââ knî y:oo yi moo yoo yi dnye dmi a nyêmî tumo, u l:ii yi mbêmê a ya yédi.

Nmî Lémi u l:êê dîy:o kmaapî

¹⁷A tîdê mbwó yoo, kópu nmyi p:uu mukîni nyongo, daa a nuu u kópu ngê a tóó. Dini ghi n:ii ngê nipi nmyinê wuwó ngê, dp:ee numo ngêêpî nyédi, ngmênê numo p:uu nmye dono nyédi. ¹⁸Mwiyé mwiyé kópu ala, ala kópu kîni nyongo, ngmîdi ngê dp:ee pyede, yoo nmyi chaa ngópu. Na a ka yi kópu ndê kópu, pee tp:oo u kwo dî kêlîmî mb:anê,^p ¹⁹mu kópu u dîy:o nmyi vy:o n:ii yoo a mbodo ndîî mbodo ndîî nyédi, nipi dpo wuwó, yinê ye kópu yilî yintómu yi lama a pyede, wo yéli yi lama dnyinté a pyede. U yi y:e a kwo yédi, Pi knî y:oo dny:oo chaa kîgha nmo. Apuu! Yinté daadî ya.

²⁰Myomoni kópu ala. Dini ghi n:ii ngê nipi nmyinê wuwó ngê, daa nmî Lémi u l:êê dîy:o nmye kmaapî nyédi, nmyi chóó nmyi l:êê dîy:o nmye kmaapî nyédi. ²¹Lukwe dîy:o nmyi chóó nmyi nté lîmîlîmî ngê nmye pîpî ngópu, noko dp:ee yeede nyédi. Lukwe dîy:o nmyi vy:o ngópuch:anê yoo a dómudómu nyédi, yoo woni knî y:oo mbwaa yilî dpî nda ngmê, u ngwo dpî ghéti dmi. ²²Nmyi chóó nmyi ngomo knî yi k:oo dmyinên:aa núknwenúknwe, myedmyinên:aa ghétighéti. Lukwe dîy:o Chóó Lémi u yoo nmyinê nmye k:omo tpile dé. Lukwe dîy:o ngópuch:anê yoo nmye mywenemywene kîgha tumo. Mumdoo yi kópu u l:êê dîy:o wanî chaa kalê nmyo? Kêle, daanê chaa kalê nmyo, daa a nuu u kópu yinmyinê d:uud:uu t:oo.

ⁿ 11:8 Gen 2:21-23 ^o 11:9 Gen 2:18 ^p 11:18 1 Kódin 1:10-12; 3:3

²³Kópuni u l:êê díy:o nipi nmo kmaapî nyédi, dmy:oongê w:ee ngópu. Nmî Lémi ngê kópuni wunê a ka a vyu, kînymyen:uu vyu. Mgídí n:ii ngê Njudas nmî Lémi u kwódo ngê ghê wo, Yesu ngê mbídédi a ngêédí, ²⁴Chóó Lémi kwuno ngê, puwâ, yepê, Ala a chóóchóó, nê, nmye yed:a kê. Yepê, Kópuni dí d:uu, myedmyinê d:uud:uu, a mgamê ngê choo ya. ²⁵Myenté, kmaapî u kuwó dini ghi ngê kapî a y:ângo, wain k:oo a pii ngê, yepê, Ala a wêê. Yepê, Yi wêê ngê Chóó Lémi ka pi yilí wa a kââdí. Yepê, Dini ghi n:ii ngê anmyi ndanî, ntee dí d:uu, yinté myedmyinê d:uud:uu. Yepê, A mgamê ngê choo ya.^q ²⁶Dini ghi n:ii ngê nmî Lémi u l:êê díy:o yinté nmye kmaapî nyédi, wain nmye ndanî ngópu, yi ngwo u pwopwo u nt:u kópu yinmyinê nj:ii ngópu, u dí wéni n:ii ngê wa a diyé.

²⁷Yi kópu u l:êê díy:o n:ii ngê nmî Lémi u nté módó dpî ma, u mbwaa d:ââ módó myoo nda, yi pini ngê nmî Lémi u nt:u dnyinté dpî châpu, u wêê dnyinté myoo châpu. ²⁸Mb:aamb:aa ngê p:ee mwiyé dmyinê nuw:o, nmyi dyââpe nmî Lémi ngê mwiyé choo pwapî dé, u nté u ngwo dmyinê pîpî, u mbwaa d:ââ u ngwo myedmyinê ndanî.^r ²⁹Pini n:ii módó a kmaapî yédi, módó a mbwaa ndanî yédi, yi pini ngê nmî Lémi u nt:u d:uudpî mya, nmî Lémi ngê u nkwo wa kpada. ³⁰Yi kópu u l:êê díy:o nmyi vy:o pi yilí dpî mbil:a, yi wêdêwêdê daa ndî ngê dpî pyódu, knî ngmê wunê kî dpî dniye. ³¹Nmyi dyââpe mwiyé w:ee pwapî tumo, ye Chóó Lémi ngê daapî kpadakpada nmyo. ³²Dpî mya nmyo, u ngwo dpî kpada nmyo, mu kópu u díy:o u yi u ngwo a kwo, Yi l:êê ghi dmi ní wáti té, kuwa yéli yi vy:o mēdaanî kéé té.^s

³³A tîdê mbwó yoo, dini ghi n:ii ngê kmaapî tēdê nmyinê wuwó ngê, dmyinê numo t:âât:ââ. ³⁴Pini n:ii ngê dómu ndî choo kelekele, u ngomo k:oo mwiyé choo a kmaapî, nmî Lémi u yoo vy:o daapchoon:aa ñuknweñuknwe, nmî Lémi ngê u ngwo daawa a kpada nmyo. Dini ghi n:ii ngê nmye anê lê, kópu woni knî a chóó nmye an:uu vyi té.

Kópuni yilí yi l:êê díy:o Chóó Lémi u Ghê Dmi ngê u ntââ ngê dpî pyódu nmo

12 ¹A tîdê mbwó yoo, kópuni yilí yi l:êê díy:o Chóó Lémi u Ghê Dmi ngê u ntââ ngê dpî pyódu nmo, u kakémê mb:aamb:aa ngê nmye nîné chámêchámê, u ya a nga a kwo, Ntênê nmyi lama a yaa dniye. ²Nmyi lama kiyedê tóó, Yesu u yoo vy:o wunê ghêlî dpîp:e ghê dniye, Setan ngê nmyi nuw:o dmi k:omo yâpwo knî yi p:uu a kaa too, k:omo yâpwo knî ye nmyimo a ngêpê, ngmênê yi yâpwo ntóó dé, dnye yi mênê daa tóó. ³Ala ngwo pi knî y:oo Chóó Lémi u komo nmye wumê kapî ngópu, ngmênê woni yoo myewumê k:omodanê nyédi, woni knî y:oo ndéndê ngê nmye wumê kapî ngópu. Ala kópu mbêmê dmyinê myeme dé.

^q 11:25 Ex 24:6-8; Hipîlu 8:8-13 ^r 11:28 2 Kódin 13:5 ^s 11:32 Hipîlu 12:5-6

Chóó Lémi u Ghê Dmi ngê pini n:i i a mbêpê kîgha ngê, doo u ntââ Yesu u pi daawa dyênê, myenté Chóó Lémi u Ghê Dmi ngê pini n:i i a mbêpê kîgha ngê, vyîlo yi pini ngê Yesu ntênê a cháâchââ ngê, kn:aa pini doo u ntââ. Daawa vyi, Yesu nmî Lémi ndêndê.^t

⁴Dpodo daa ngmidi yi l:êê díy:o Chóó Lémi u Ghê Dmi ngê u ntââ ngê dpo pyódu nmo. Yi Ghéni Dmi mu ngmidi u wêdêwêdê mbêmê nmo dpodo nyédi, daa kn:aa ghéni dmi u wêdêwêdê mbêmê yi dpodo nmo dódó too.^u ⁵K:omo tpile nmî Lémi p:uu daa dpodo ngmidi nmo dódó ngê, ngmênê nmî Lémi mu ngmidi p:uu nmo dpodo nyédi. ⁶K:omo tpile daa dpodo ngmidi yi p:uu Chóó Lémi ngê u ntââ ngê dpo pyódu nmo, ngmênê Chóó Lémi mu ngmidi p:uu nmo dpodo nyédi. ⁷Nmo ngmêngmênté nmî dpodo têtê dpodo têtê Chóó Lémi u Ghê Dmi ngê u ntââ ngê dpo pyódu nmo, mu kópu u díy:o u yi u ngwo a kwo, Nmî Lémi u yoo yintómu wêdêwêdê ngê paa pyaa dniye.^v ⁸Dye ghi knî ngmê ngê yi Ghéni Dmi ngê pi knî ngmê u ntââ ngê dpo pyódu té, nmî Lémi u nuw:o ndîf mbêmê pi knî ye u ngwo a mbumu nyédi. Dye ghi knî ngmê ngê yi Ghéni Dmi ngê pi woni knî ye tumu kópu dé dpo kêma té, yi yéli y:oo yi kópu dyuu pi knî ye u nkwo dpî vyi t:oo.^w ⁹Yi Ghéni Dmi ngê pi knî ngmê yi kêlîmî ndîf ngê dpo pyódu, pi woni knî u ntââ ngê dpo pyódu té, yoo u ngwo a pyipyi tumo.^x ¹⁰Yi Ghéni Dmi ngê pi knî m:uu u ntââ ngê dpo pyódu té, mbwudu u ngwo dpî chaa t:oo. Pi knî m:uu u ntââ ngê dpo pyódu té, Chóó Lémi u komo pi knî ye u ngwo a kapî ngópu. Pi knî m:uu u ntââ ngê dpo pyódu té, ghê dmi yinê dpî mya t:oo. Péntikos u wo ngê kópuni y:e pyodo, Chóó Lémi u Ghê Dmi ngê yinté kópu ala ngwo mye d:uud:uu ngê, yoo woni u ntââ ngê yinê dpo pyódu té, kn:aa dyámê dne ye daa yi lama pi knî ye a mbumu nyédi. Pi knî m:uu u ntââ ngê dpo pyódu té, yi kópu dyuu dpo w:ee t:oo, pi knî ye yi kakê mê moo chámê t:oo.^y ¹¹Vyîlo yi Ghéni Dmi ngê nmo ngmêngmênté dpodo yilî yi l:êê díy:o u ntââ ngê dpo pyódu nmo. Daa nmî chóó nmî nuw:o knî yi mbêmê dpo ngmidi nmo, ngmênê chóó u pono a vyápê yédi, nmî dpodo íedê dpodo íedê u ngwo dpî kaa nmo.

Nmo Yesu Kédisu kóó kpâlî dé

¹²Pi p:uu tpile yilî ntee a pyodopyodo, nmî Lémi Yesu Kédisu u yoo mye yinté, u yoo vy:o pi dyêêdí yilî a kwo, nmî dpodo íedê dpodo íedê kaa nmoo.^z ¹³Chóó Lémi ngê u Ghê Dmi ngê mbáptisím kalê nmoo, Yesu u yoo vy:o u ngwo nmî ghê dniye. Ala ngwo ngmidi ngê nmo pyede, ngmênê mwiyé u mo mo nme a ya. Nmo knî ngmê Nju tpémi, knî ngmê

^t 12:3 1 Njon 4:2-3 ^u 12:4 Lóma 12:6-8 ^v 12:7 1 Kódin 14:26 ^w 12:8 Njon 4:16-19; Dpodo 5:1-5 ^x 12:9 Dpodo 3:6-7; 8:6-7; 14:8-10 ^y 12:10 Dpodo 2:4; 1 Kódin 14:5-12
^z 12:12 Lóma 12:4-5

daa Nju tpémi, knî ngmê yi pi dmi ndîi dé, knî ngmê yi pi dmi têtê dé, ngmênê Chóó Lémi u Ghê Dmi ngê ngmîdi ngê a pyódu nmoo, Yesu Kédisu kóó kpâlî ntee tpile ngê pyódu nmoo, yinë a mbêpê kîgha nmoo.^a

¹⁴Pi p:uu tpile yilî ntee a pyodopyodo, nmî Lémi u yoo mye yinté, nmo yintómu nmî dpodo daa ngmîdi, nmyi k:iî nmî dpodo ñedê dpodo ñedê a kaa nmoo. ¹⁵Yi dpodo knî yi p:uu dyimê pywuu nmye ngmênîné kuwo. Pi yu wo pi, daapaa vyi, D:aa pi kóó, u l:êê díy:o pi p:uu dîni kwo. Kêle, pi yu pi p:uu a kwo. ¹⁶Pi ngwene myenté, wo pi, daapaa vyi, D:aa pi ngwolo, u l:êê díy:o pi p:uu dîni kwo. Kêle, pi ngwene pi p:uu a kwo. ¹⁷Pi d:ud:umbiy:e ngwolo ngê wo tóó, ye dnye angênté pí nyêmî. Myenté, pi d:ud:umbiy:e ngwene ngê wo tóó, ye tpile tuu angênté pí nyêmî. ¹⁸Ngmênê Chóó Lémi chóó doo nuw:o, pi p:uu tpile yilî u ngwo l:âmo ngê, kóó yu kaa too, ngwolo dê kaa doo, ngwene dê kaa doo, ñupu dê t:ee doo. ¹⁹Yi tpile knî pi p:uu wodaa kaa too, ye pi daa pi ngê yipî tóó, yi pââ ntee tpile ngê pí tóó. ²⁰Ngmênê pi alanté a tóó, tpileni yilî p:uu a pyodopyodo, yi dpodo yi dpodo a tóó. Yesu u yoo mye yinté, nmî dpodo ñedê dpodo ñedê a kaa nmoo.

²¹Yi kópu u l:êê díy:o, pi ngwolo wo pi, kóó dê ye daapaa vyi, Dpî dpodo daa tóó, mwada y:i lee cho. Kêle, doo u ntââ. Yi ngwolo ngê dpodo angênté pí dódó. Myenté, pi mbodo wo pi, yu dê ye daapaa vyi, Dpî dpodo daa tóó, mwada y:i lee cho. Kêle, doo u ntââ. Yi mbodo angênté pí paa. Nmo mye yinté, nmî vy:o woni ngwolo ntee tpile dé, woni kóó kpâlî ntee tpile dé. ²²Nmî p:uu tpileni daa dpodo u ntââ dé, doo u ntââ daanmî kée té. ²³Nmî p:uu tpileni yi pi dmi têtê dé, mb:aamb:aa ngê ye nmo vuywo nyédi. Tpile n:iî dê pi ngê d:uudpî m:uu dê, mb:aamb:aa ngê nmo wópuwópu doo, ²⁴ngmênê nmî p:uu ghê tpile woni pi daa wópuwópu too. Chóó Lémi ngê yinté l:âmo nmoo, nmî p:uu tpileni yi pi dmi daa ndîi dé, mb:aamb:aa ngê ye nmo vuywo nyédi. ²⁵Doo u ntââ nmî p:uu ghê tpile woni daanmî kée té, mu kópu u díy:o ghi ngmîdi a wee, numo ka a vuywo nyédi. ²⁶Pi p:uu ghi ngmîdi adî dpududpudu, ye pââ p:uu ghi yintómu mye dpududpudu yédi. Dpodoni pi ngê kílî dpî dóó anyi chaa kwolo, ye u gha mb:aamb:aa ngê dpî pyódu, u pââ p:uu tpile yilî mb:aamb:aa ngê moo pyódu.

²⁷Nmo yintómu Yesu Kédisu p:uu nmo pyede, nmo kóó kpâlî dé.^b ²⁸Yesu u yoo vy:o Chóó Lémi ngê u dpodo ñedê dpodo ñedê a kaa nmoo, mwyémwiyé yéli, dyépi yoo, myomoni yoo, komo kapî pyu yoo, pyoloni yoo, dêêpî pyu yoo, podoni yoo, n:iî knî y:oo Chóó Lémi u wêdêwêdê mbêmê mbwudu dpî chaa t:oo, limoni yoo, pi pyipyi pyu yoo, wononi yoo, pi ka vuywo pyu yoo, piini yoo, dy:oo pyu yoo, woloni yoo, yélini kn:aa dyámê dnye ngê daa yi lama a mbumu nyédi.^c ²⁹Yesu u yoo vy:o pi

^a 12:13 Nkal 3:28 ^b 12:27 Lóma 12:5 ^c 12:28 Epeso 4:11-12

pyile njini dyépi yoo, daa yilí komo kapí pyu yoo, daa yintómu dêêpí pyu yoo. Daa pi yintómu kní y:oo mbwudu a chapí tumo, ³⁰daa pi yintómu a pi pyipyi nyédi, daa pi yintómu kn:aa dyámê dnye ngê a mbumu nyédi, daa pi yintómu yinté kópu u kakê mê chámêchámê u ntâa ngê a pyede. ³¹Dpodoni yi pi dmi ndîf dé yi yi dmi nmye dny:oo kwo, ngmênê kópuni u pi d:ud:umbiy:e ndîf, u kakê mê nmye nînê chámêchámê.^d

Yoo yi nuu ghi dmi numo nódo dny:oo ya

13 ¹Kópuni ndîf kópu ngê a tóó ala, nmyi nuu ghi dmi numo nódo dny:oo ya. K:omo tpile kn:aa dyámê dnye ngê daa a lama aní mbumu, enjel yoo yi dnye ngê amy:aa mbumu, ngmênê yoo yi nuu ghi dmi a nódo daadí ya knomomê, ye módó nmye pîní mbumu.^e ²Myenté, Chóó Lémi u komo aní kapí knomomê, tumo kópu yilí a lama adí ya knomomê, ngmênê yoo yi nuu ghi dmi a nódo daadí ya knomomê, ye p:aa k:omo tpile. Myenté, a kêlímî ndîf ngê wa pyaa knomomê, yi kêlímî mbêmê u ntâa mbu mwada y:i ngmaní dy:ââ, ngmênê yoo yi nuu ghi dmi a nódo daadí ya knomomê, ye waní dîpí. ³K:omo tpile a tpile yintómu pi kní ye waní y:ee té, ngmênê yoo yi nuu ghi dmi a nódo daadí ya knomomê, ye Chóó Lémi ngê daawa chaa kalê nê. Dini ghi n:i ngê pi kní y:oo u yi y:e adí kwo, Yesu u kópu u kwee nmî chápwo, yi ngwo Yesu daaní kée knomomê, u l:êê díy:o yi yéli y:oo ndiya wa kée nê, ngmênê yoo yi nuu ghi dmi a nódo daadí ya knomomê, ye Chóó Lémi ngê myedaawa chaa kalê nê.

⁴Pini n:i nódo yoo yi nuu ghi dmi mb:aamb:aa ngê a tóó, pi ka límîlímî ngê d:uudpí nod:e, pi kní ye a vuywo yédi. Yi pini daa ní:ee kapí yédi, chóó u pi daa kmîmî ngê, myedaa chaa yédi.^f ⁵Yi pini a pi chââchââ yédi, daa chóó u kópu kní yi p:uu a nuw:o yédi, daa nod:enod:e yédi, yoo yi dono kópu dé nódo daa t:emí too. ⁶Yi pini dono kópu kní yi l:êê díy:o u gha mb:aamb:aa ngê d:uudpí pyódu, ngmênê ndê kópu kní yi l:êê díy:o u gha mb:aamb:aa ngê dpí pyódu. ⁷N:i nódo yoo yi nuu ghi dmi a ya yédi, yoo yi dono kópu dé u kuwó dpí kée té, mēdaa nuw:onuw:o too. Pi kní ye a kêlímî yédi, ghêlî d:uudpí kée té, alanté a nuw:o yédi, dpo, Díyo mb:aamb:aa ngê mē pyodopyodo té.^g

⁸Nmî nuu ghi dmi numo nódo adí ya knomomê, ye yi kópu chedê ngê daawa pyódu. Pi kní y:oo Chóó Lémi u komo ala ngwo a kapí ngmê, ngmênê díyo chedê ngê wa pyódu. Pi yoo kn:aa dyámê dnye ngê a mbumu nyédi, ngmênê díyo chedê ngê wa pyódu. Chóó Lémi ngê kópu woni nmo dpo vyi té, nmî lama u ngwo dpí yaa dmi, ngmênê díyo yi kópu chedê ngê amye pyódu. ⁹Ala ngwo kópu pyile njini nmî lama a tóó, Chóó Lémi u komo dnyinté nmo kapí ngê, ¹⁰ngmênê dini ghi n:i ngê

^d 12:31 1 Kódin 14:1 ^e 13:1 1 Kódin 12:31; 14:39 ^f 13:4 Lóma 13:10 ^g 13:7 1 Pita 4:8

tpile yintómu ntênê anmî m:uu té, yi kópu yilí chedê ngê wa pyaa dmi. ¹¹Dyimê pywuu nmye ngmênîné kuwo. Dini ghi n:ii ngê tp:ee noo a ya, tp:ee u nuw:o a mênê yedoo a kwo, tp:ee u kópu dyuu yinoo a tpaépê dé, myenoo a d:uud:uu dé. Dini ghi n:ii ngê mâawe ngê ní pyodo, tp:ee u kópu dyuu nê kuwo ngê. ¹²Yi kópu u nt:u kópu ala. D:ââ pudu knî yi kââ dmi mbwaa paa ntee anyi m:uu té, Chóó Lémi u kópu yilí yinté nmo yenê too, ngmênê díyo nmî nkígh:ê ntênê anmî m:uu té. Chóó Lémi u kópu dyuu ala ngwo dnyinté nmî lama a kwo, u lama ntee nmo pyede, yi ngwo yinté nmî lama u nkwo wa yââ.^h

¹³Ala kópu pyile knî chedê ngê daawa pyaa dmi, yoo yi nuu ghi dmi numo nódo ya ngmê, kêlîmî myomo, nmî Lémi u t:âât:ââ pyolo. Yi kópu pyile knî yi vy:o mwiyéni yi ndîni, nmyi nuu ghi dmi numo nódo dny:oo ya.

**Chóó Lémi u komo kapî kada a tóó, kn:aa
dyámê dnye ngê mbumu kuwó a tóó**

14 ¹Ala kópu ndîi kópu ngê nmye choo ya, nmyi nuu ghi dmi numo nódo ntênê dny:oo ya. Myenté, u yi nmye choo kwo, Chóó Lémi u Ghê Dmi ngê dpodo íedê kaa nmîne, yi dpodo u ntââ ngê mye pyódu nmîne. Yi dpodo knî yi vy:o, Chóó Lémi u komo kapî yi ndîi kópu, kn:aa dyámê dnye ngê mbumu pee tp:oo.ⁱ ²Pini n:ii kn:aa dyámê dnye ngê doo u lama a mbumu yédi, myedaa pi knî yi lama a mbumu yédi, d:uuwodê w:ee t:oo. Yi kópu u l:êê díy:o daa pi knî ye a mbumu yédi, ngmênê Chóó Lémi ka a mbumu yédi, u Ghê Dmi mbêmê ngmee u kópu dé dpî vyi té. ³Ngmênê pini n:ii ngê Chóó Lémi u komo a kapî ngê, pi knî ye a mbumu yédi, dpî ngee té, dpî wêdêwêdê kalê té, yi gha dmi myoo pywâlî té. ⁴Pini n:ii doo u lama kn:aa dyámê dnye ngê a mbumu yédi, chóóchóó ye ngêêpî ngê, ngmênê pini n:ii ngê Chóó Lémi u komo a kapî ngê, Yesu u yoo yintómu ye ngêêpî too.

⁵U ya a nga a kwo, Nmyo yintómu u ntââ ngê nmyi pyaa dmi, kn:aa dyámê dnye ngê u ngwo anmyi mbumu, ngmênê ndëndê ngê u ya a nga a kwo, U ntââ ngê nmyi pyaa dmi, Chóó Lémi u komo u ngwo anmyi kapî. Pini n:ii ngê Chóó Lémi u komo a kapî ngê, kópu ndîi ye d:uud:uu ngê, ngmênê pini n:ii kn:aa dyámê dnye ngê a mbumu yédi, daa kópu ndîi ye d:uud:uu ngê. Pi knî ye yi kópu dyuu daawa tpaá knomomê, ye angênté wa ngee té. Pi ngmê ngê yi kópu dyuu pi knî ye wa tpaá knomomê, ye wa ngee té.^j

⁶A tídê mbwó yoo, dini ghi n:ii ngê nmye anê lê, kn:aa dyámê dnye ngê nmye anîn:aa mbumu knomomê, ye lónté an:uu ngee nmyo. Ngmênê Chóó Lémi u komo nmye an:uu kââ, ó kópu ngmê nmyi nuwo an:uu

^h 13:12 1 Njon 3:2 ⁱ 14:1 1 Kódin 12:31; 14:39 ^j 14:5 Dpodo 11:27-28; 15:32; 21:4,9-12

kwolo, ó nmye anîn:aa dêêpî, ye vyílo yi kópu knî y:oo u ngwo wa ngee nmyo. ⁷Dyimê pywuu nmye ngmênîné kuwo. Nkéli mbywuu pââ dnyinté anyi wêê knomomê, ye pi knî y:oo u l:uu lónté wa mya ngmê. ⁸Myenté, lede yoo yi vy:o n:ii ngê nkéli dpuwo dpî wuu, l:uu dnyinté dpo yé knomomê, ye yi lede knî y:oo lónté wa a w:ee ngmê, yi lama daadî ya yi ngwo l:êê, yi l:êê u tpile dé daawa l:âmo t:oo. ⁹Myenté, kn:aa dyámê dnye ngê anmyi mbumu knomomê, ye pi knî y:oo lónté wa a w:ee ngmê. Nmyi kópu dyuu módó wa ny:ee t:oo, yi mênê daawa kee dmi, adnyi ntééntéé. ¹⁰Dyámê mbêmê dyámê mbêmê dnye dyêêdî daa ngmidi a tóó, yintómu yi nt:u dmi a pyede. ¹¹Ngmênê kn:aa dyámê pi nmî vy:o ngmadî kwo knomomê, chóó u dnye ngê nmo adî mbumu knomomê, ye lónté anmo w:ee. Myenté yi pini ngê nmî dnye dmi myedaawa a w:ee. ¹²Nmyi wêdêwêdê kîgha mye yinté. U yi nmye a kwo, Chóó Lémi u Ghê Dmi mbêmê kópu ndîî knî ngmênî d:uu. Kópu n:ii ngê yoo dpî wêdêwêdê kwolo, yi kópu knî yi p:uu dmyinê ngêpê.^k

¹³Pini n:ii doo u lama kn:aa dyámê dnye ngê a mbumu yédi, nmî Mî ka mîchoo ngêpê, u ntââ ngê paa pyódu ngê, pi knî ye chóó u kópu dyuu paa tpaá ngê. ¹⁴Dini ghi n:ii ngê kn:aa dyámê dnye ngê n:aa ngêpê yédi, a ghê dmi ntênê a ngêpê yédi, ngmênê daa a lama n:aa mbumu yédi, a nuw:o a líme yédi. ¹⁵Yi kópu u l:êê díy:o ghê dmi mbêmê n:aa ngêpê yédi, a nuw:o mbêmê myenî ngêpê yédi, ghê dmi mbêmê n:aa wéti yédi, a nuw:o mbêmê myenî wéti yédi.^l ¹⁶Dini ghi n:ii ngê pi ngmê ngê ghê dmi mbêmê Chóó Lémi dpî chaa kwolo, pi knî y:oo angênté wa vyi ngmê, Ndê kópu, mu kópu u díy:o daa yi lama dpî chaa kwolo. ¹⁷K:omo tpile yi pini ngê Chóó Lémi mb:aamb:aa ngê dpî chaa kwolo, ngmênê yoo d:uudpî ngee té.

¹⁸Chóó Lémi n:aa kwunokwuno ngê, mu kópu u díy:o u ntââ ngê dpo pyódu nê, kn:aa dyámê dnye ngê a mo dnyinté dîní mbumu yédi, yinté mbumu ngê nê t:ee kalê nmyoo. ¹⁹Ngmênê Yesu u yoo vy:o yinté ye dîní mbumu yédi, mu kópu u díy:o kn:aa dyámê dnye ngê kópu yono yono y:a ye wanî vyi knomomê, daawa a w:ee t:oo. Ngmênê kópu pyile njini a nuw:o mbêmê ye wanî vyi té, wa a w:ee t:oo, u ngwo wanî wêdêwêdê kalê té.

²⁰A tídê mbwó yoo, mb:aamb:aa ngê dmyinê nuw:o. Tp:ee ntee a nuw:o yédi, yinté nuw:o dpî yé yó. Tpómu u lama dono ntee daa tóó, yinté dono nmyi mênê myekîngê ya, ngmênê pyââwe mââwe ntee a nuw:o nyédi, yinté dmyinê nuw:o.^m ²¹Chóó Lémi u kópu puku yedê alanté ló dini a d:êê ngópu, apê,

A yoo knî y:oo a dnye daa nyêmî ngópu,
u l:êê díy:o kn:aa yéli wanî ngee té,
kaa taa ngê a yoo knî ye adnyi mbumu,

^k 14:12 Epeso 4:12 ^l 14:15 Epeso 5:19 ^m 14:20 Epeso 4:14

yi chóó yi dnye ngê ye amyidnyi mbumu,
ngmênê a yoo knî y:oo a dnye myedaawa ny:ee ngmê.ⁿ

²²Yi kópu u l:êê díy:o, yélini nmî Lémi ka daa kêlímî té, dini ghi n:ii ngê kn:aa dyámê dnye kópu dyuu dpî ny:ee ngmê, ala kópu u ngwo dny:oo tpaê, apii, Yoo ndêndê vy:o dpino wee, kuwa nmo wee, Lémi ndîi ngê wa kpada nmo. Yélini nmî Lémi ka a kêlímî té, yi kópu d:uudpî vyi ngmê. N:ii ngê Chóó Lémi u komo dpî kââ, Yesu u yoo dpî wêdêwêdê kalé té, ngmênê kuwa yéli kuu dé, d:uudpî geeg té.

²³Ngmênê Yesu u yoo yintómu nipi anmyinê wuwó knomomê, kn:aa dyámê dnye ngê kn:aa dyámê dnye ngê anmyi mbumu knomomê, yélini daa kêlímî nyédi nmyi ngêpê têdê amye taa dmi, Yesu ka myedaawa kêlímî mbê dmi, noko yewo, Kêdê ghéti dmi. ²⁴Ngmênê Chóó Lémi u komo anmyi kapî knomomê, pini n:ii daa kêlímî yédi nmyi vy:o amyimê ghê knomomê, kópuni wa ny:ee té, u ngwo wa a w:ee, awo, Nê pi dono, a kpadakpada u maa p:uu n:aa kwo.^o ²⁵Chóó u tumu kópu dé yi ngwo wa ny:ee té, yed:oo yu mbodo dê y:e wa ghê, Chóó Lémi wa chaa kwolo, nmyewo, Yâpwo ndêndê ntênê nmyi vy:o a kwo.

Nipi ngêpê u kópu dé

²⁶A tîdê mbwó yoo, dini ghi n:ii ngê nipi nmyinê wuwó ngê, pi ngmê ngê wéti kn:ââ a chapî ngê, ngmê ngê dêêpî a yémî ngê, ngmê ngê Chóó Lémi u komo a kapî ngê, ngmê kn:aa dyámê dnye ngê a mbumu yédi, ngmê ngê yi kópu dyuu pi knî ye a tpiyé ngê. Kópuni yintómu nmye d:uud:uu tumo, yoo yi wêdêwêdê kîgha u l:êê díy:o dmyinê d:uud:uu dé. ²⁷Daa nuw:o mbêmê kn:aa dyámê dnye ngê mbumu nmyi vy:o ndîi ngê kîngê pyódu. Pi miyó pyile choo ghodoghodo, ngmêngmênté dny:oo mbumu, yed:oo munto. Pi ngmê ngê yi kópu dyuu pi knî ye mîchoo tpiyé. ²⁸Dnye tpiyé pyu nmyi vy:o daachoo kwo knomomê, ye kn:aa dyámê dnye ngê pi doo u lama mêkîngê mbwólu, tumu choo ya, chóó u nuw:o k:oo Chóó Lémi ka mîchoo mbumu. ²⁹Pi miyó pyile knî y:oo pi knî ye Chóó Lémi u komo dny:oo kapî, woni yoo yi kópu knî yi p:uu ntênê dny:oo nuw:o.^p ³⁰Ngmênê Chóó Lémi ngê pi ngmê ka kópu m:uuwa a vyi knomomê, choo ghodoghodo, yi kópu pi knî ye choo tpaê, n:ii mwiyé adî mbumu, mbwódo choo yââyââ. ³¹Nmyo ngmêngmênté Chóó Lémi u komo dmyinê kapî, mu kópu u díy:o pi yintómu knî y:oo pêdê w:ee téne, wêdêwêdê ngê myepaa pyaa dniye. ³²N:ii knî y:oo Chóó Lémi u komo a kapî ngópu, nuw:o mbêmê a mbumu nyédi. Pi ngmê ngê danêmbum u yi choo kwo knomomê, ye komo kapî pyu mbwódo choo yââyââ, ³³mu kópu u díy:o Chóó Lémi ngê u yi u ngwo daa kwo, Pi yilî dye ghi ngmidi mbêmê dny:oo mbumu, ngmênê u yi u ngwo a kwo, a yoo noko mb:aamb:aa ngê dny:oo ya.

ⁿ 14:21 Is 28:11-12 ^o 14:24 Njon 16:8 ^p 14:29 Dpodo 17:11; 1 Tes 5:20-21

Yesu u yoo knî yi vy:o, p:aani p:aani ntee a tóó, ³⁴nmyi vy:o mye yinté choo ya, dini ghi n:ii ngê nipi nmyimo a wuwó knomomê, pyââ yoo tumu dny:oo ya, myedaadny:oo dêêpî. Kada daadnyen:aa wowo, mu kópu u díy:o yinté kópu puku yedê ngma a tóó.^q ³⁵Myenté, kópuni daadnya a wopwe dé, yi moo knî ye p:o dny:oon:aa póó. Pyópuni ngêpê têdê chóó u nuw:o mbêmê adí mbumu knomomê, ye mywene u ngwo adí wowo.

³⁶Lukwe díy:o nmyi l:êê ghi dmi u mo dé? Mumdoon nmyinê nmye Chóó Lémi u kópu dyuu mwiyé nmyinê ny:ee tumo, mdoo nmo nmyi chóó nmyinê núw:o ngópu? Nmyinê nmye pi m:uu u lama Chóó Lémi u kópu dyuu daangma a kwo? ³⁷Pini n:ii ka ngmênê u kwo chóó Chóó Lémi u komo kapî pyu ngmê, u Ghê Dmi mbêmê kópu yilî n:aa d:uud:uu too, yi pini ngê dpî vyi ngê, Nê ngê nmî Lémi u kópu ntênê yedê d:êê. ³⁸Ngmênê yi pini ngê a dnye daawa ny:ee knomomê, u dnye u nkwo nangê ny:oo.

³⁹A tîdê mbwó yoo, ala danêmbum u dí al:ii n:aa yiyé. U yi nmye choo kwo, Chóó Lémi u komo nmî kapî, myenté pi knî ye kn:aa dyámê dnye ngê mbumu nangê kwódu. ⁴⁰Dini ghi n:ii ngê nipi nmyinê wuwó ngê, kópu yilî yintómu ntênê dmyinê d:uud:uu dé.

Yesu u pyidepyide u danêmbum

15 ¹A tîdê mbwó yoo, Yesu p:uu kópuni nmye n:uu vyi too, nmye mênîné vyílîvyílî té. Yi kópu dyuu nmyi ny:ee tumo, ye nmyi kêlîmî mbê dniye, nmyi nuw:o dmi yi p:uu my:ee kaa ngópu. ²Yi kópu dyuu ka ntênê anmyi kêlîmî knomomê, dpodombiy:e anmyi mgîmî knomomê, ye nmî Lémi ngê kóó k:oo wa kaa nmyo.

³Kópuni nmye n:uu vyi too, ala yi ndî kópu. Kópuni puku yedê a pyede, Yesu Kédisu ngê yinê ntiye too, nmî dono chedêchedê u l:êê díy:o pwene.^r ⁴Puku yedê kópu m:uu Yesu ngê mye ntiye ngê, dini ghi n:ii ngê kmênê ngópu, wo pyoloni ngê mêtê pii wo.^s ⁵Myenté, Pita ka chóóchóó a kêma ngê, u dyépi y:a mê miyó knî ye chóóchóó myedê kêma ngê.^t ⁶U kuwó dini ghi ngê p:uu ndiye pyu limo yono y:a pwodo knî ye chóóchóó ye a kêma ngê, nipi m:uu ngópu. Yi yéli ka pyede, knî ngmê wunê kî dpî dniye. ⁷U kuwó dini ghi ngê u mbwó Njems ka chóóchóó a kêma ngê, u dyépi yintómu knî ye chóóchóó mêtê kêma ngê.

⁸K:omo tpile d:oo u pee pini ngmê, ngmênê kuwókuwó dini ghi ngê chóóchóó a ka myedê kêma ngê.^u ⁹Yesu u dyépi knî yi vy:o kuwó nîné tóó, a pi têtê, doo u ntââ dyépi ngê daap:aa pyodo, mu kópu u díy:o Yesu u yoo kînoo a vyeé dé.^v ¹⁰Ngmênê Chóó Lémi ngê daa kpada noo, kópu mb:aa a nga yi d:uu ngê, a ngmîdi noo, u dyépi ngê a pyódu noo. Daa módó a ngmîdi noo, mu kópu u díy:o dpodombiy:e n:aa dpodo yédi, dyépi

^q 14:34 1 Kódin 11:3; 1 Tim 2:11-12 ^r 15:3 Is 53:8-9 ^s 15:4 Dpodo 2:24-32; Luukí 24:46
^t 15:5 Luukí 24:33-34,36 ^u 15:8 Dpodo 9:3-6 ^v 15:9 Dpodo 8:3

yoo nî t:ee kalê too. Daa a chóó a wêdêwêdê mbêmê nî t:ee kalê too, Chóó Lémi u wêdêwêdê mbêmê n:aa dpodo yédi. ¹¹ Yi dyépi knî yi k:ii kópu mu ngmidi dyuu yino tpapê ngê, vyílo yi kópu knî ye nmyi kélímí mbê dniye.

Nmî pyidepyide u danêmbum

¹² Pi knî ye nmo tpapê ngê, yenmîmo, Yesu ka a pii wo. Lukwe díy:o nmyi vy:o pi ngmê knî y:oo ala kópu a tpapê ngmê, apu, Pi dpî pw:onu, mêt:uudpo pyidu. ¹³ Yi kópu wo ndê kópu, ye pyidepyide daapê tóó, Yesu Kédisu myedaapêdê pii wo. ¹⁴ Yesu Kédisu wodêpê pii wo, ye u kópu dyuu módó pono tpapê, módó u kwo p:ee kélímí mbê dniye. ¹⁵ Pyidepyide wodaa tóó, ye Chóó Lémi p:uu nmye pono kêêmí kapí té, mu kópu u díy:o nmyenmîmo, Chóó Lémi ngê Yesu Kédisu kpêênî mêtê pyidu ngê.^w ¹⁶ A tîdê mbwó yoo, pyidepyide wodaa tóó, ye Yesu Kédisu daapêdê pii wo. ¹⁷ Myenté, Yesu Kédisu wodêpê pii wo, ye módó u kwo p:ee kélímí té, nmyi dono daapî chedê too. ¹⁸ Yesu u yoo vy:o yélini wunê a dpî dniye, angênté pí pyaa dniye, yi l:âmo dmi pêtê ngêpa wo. ¹⁹ Pyidepyide wodaa tóó, ye daapod:o pii dmi, dyámê mbêmê kópu knî yi p:uu pono nuw:o té, dyámê mbêmê tpémi yi dono yilí módó pênminê vyímí té, kuwókuwó wéni ngê mb:aamb:aa daapod:o pyw:oo, ngópuch:anê ndîi ngê pudu pyaa dmi. Dini ghi n:ii ngê dyámê mbêmê dono nmînê vyímí té, nmî nuw:o dmi nmî pyidepyide p:uu a kwo.

²⁰ Ngmênê dp:oo ngópuch:anê yoo, Yesu Kédisu kpêênî mwiyé a pii wo, nmî kada ghê wo, yinté amyino pii dmi.^x ²¹⁻²² Adam ngê pwopwo u kn:ââ ntee a chópu, Yesu Kédisu ngê pyidepyide u kn:ââ yinté mye chópu. Nmo yintómu anmî pw:oo dmi, mu kópu u díy:o nmî kn:ââ mu ngmidi, Adam. Yesu u yoo mye yinté. Yesu Kédisu ngê chóó u kwo a kââdi nmo, yinê amêdê pyidu nmo.^y ²³ Chóó Lémi ngê kópu yilí yintómu u mâlo dpî d:uu té. Yesu Kédisu mwiyé a pyidu ngê, nmî kada kââ. Dini ghi n:ii ngê wa a diyé, yi ngwo wa a pyidu nmo, yélini yi k:ii u kwo nmo kélímí té.^z ²⁴ Kuwókuwó wéni ayi d:ii, Yesu Kédisu ngê kada pini yoo wa a gh:ay té, nkwépi yoo wamyedê gh:ay té, pi yintómu adí y:enê dé, u Mí Chóó Lémi u maknopwo wa yé té. ²⁵ Yesu king ngê adí ya, yélini p:uu adnyi l:êê, yu yodo u maknopwo wa yé té. ²⁶ Kuwókuwó dini ghi ngê pwopwo yu yodo u maknopwo wamyé yé, yélini pw:oo dniye wa a pyidu té.^a ²⁷ Puku yedê alanté a tóó, tpile yintómu u maknopwo dny:oo ya. Nmî lama ka tóó, Chóó Lémi Tp:oo u maknopwo daawa yââ,^b ²⁸ ngmênê dini ghi n:ii ngê Chóó Lémi ngê tpile yintómu Tp:oo yu yodo u maknopwo wa yé té, Tp:oo Chóó Lémi u maknopwo wa yââ, tpile yintómu Chóó Lémi u maknopwo u ngwo adnyi ya.

^w 15:15 Dpodo 4:33 ^x 15:20 1 Tes 4:14 ^y 15:21-22 Lóma 5:12,18 ^z 15:23 1 Tes 4:16
^a 15:26 Tpyuu 20:14 ^b 15:27 Psalm 8:6

²⁹Yélini wunê a pw:oo dniye yi l:êê díy:o, pi woni knî y:oo mbápitísîm dpo ngee ngmê. Pyidepyide wodaa tóó, ye yinté daapí d:uu ngópu. ³⁰Pyidepyide wodaa tóó, ye pono nkíngê té, Yesu u pi pi knî ye daapono tpaépê.^c ³¹A tîdê mbwó yoo, nmî Lémi Yesu Kédisu ngê a ngee noo, u yoo vy:o n:uu kaa nmyoo. Yi kópu ngê nmye nîné kpaá, dîní k:omodanê, dye ghi yintómu pwopwo u keñe t:âmo n:aa kwo. ³²Layoni ngê pi ntee dpí vy:a, Epeso tpémí mye yinté dé, a vyeé u yi y:e a kwo. Pyidepyide wodaa tóó, ye al:ii yi vy:o daapínîn:aa dpodo. Pyidepyide wodaa tóó, alanté p:oo nuw:o té, pínmî, Nté ndîî yilí ma koo, mbwaa yilí nda koo, mââ m:ii anmî pw:oo dmi.^d ³³A tîdê mbwó yoo, n:ii knî y:oo yinté kópu a tpaépê tumo, maa dono p:uu kíngê kaa nmyo. Nmyi lama ka tóó, yoo dono yi vy:o pini n:ii a kwo yédi, u l:êê ghi dono ngê dpí pyódu. ³⁴Dono u maa a kuwo yó, mb:aamb:aa ngê dmyinê nuw:o. Mywene nmye choo kwo. Nmyi vy:o knî ngmê yi lama Chóó Lémi daa tóó.^e

Nmî Lémi ngê ntee wa a pyidu nmo

³⁵N:ii pyidepyide ka daa kélímí, a ka wa a póó, a ka wo, Pi dpí pw:onu, angénté amédê pyidu? A ka wo, Doo u ntââ. A ka wo, Ntóó wa mg:eme, yi pini p:uu angénté too améyi ya. ³⁶Yi pini mbodo podo. L:êê yini w:uu ó ló ntini w:uu ngomo k:oo adí ya, doo u ntââ daawa pyidu. Ngmênê têpê mênê anyi ntówo, u ngwo dpí pyidu. Pi mye yinté. N:ii a ya yédi, too yi ngwo d:uudpí ngmêê, ngmênê dpí pw:onu, u kuwó dini ghi ngê kamí ngê moo pyidu. ³⁷Myenté, têpê mênê daa yi ayi ntówo, ngmênê w:uu ayi ntówo, witi w:uu ó ló ntini w:uu. W:uu têpê mênê ntee anyi ntówo, yinté d:uudpí k:aa, ngmênê yi ngê dpí pyódu, yââ nkwodo yilí dpí ghê. ³⁸Chóó Lémi ngê dpo pyidu, yi ngê dpí pyódu. Ntee doo a nuw:o, yinté d:uu ngê. Yi yintómu yi dyêêdí dyêêdí a tóó, yi w:uu u mo u mo dé.^f

³⁹Tpileni yi ghê a pyede, mye yinté dé, yi dyêêdí dyêêdí a tóó. Pi too u mo, tpile tp:oo too u mo, ímê too u mo, te too u mo.

⁴⁰Tpileni mbóó dyámê yi mbêmê a pyede, mye yinté. Woni knî yi wuu ndîî, woni knî yi wuu daa ndîî. ⁴¹Kâádí u wuu ndîî, d:ââ u wuu pee tp:oo, pudu knî yi wuu tédê. Myenté pudu woni knî yi wuu ndîî dé, woni knî yi wuu tédê dé.

⁴²Pyidepyide mye yinté. Pini n:ii dpí pw:onu, yinté mêdaawa a pyidu. Pini n:ii dpí pw:onu, têpê ngê dpí ma, chedê ngê dpí pyódu. Dini ghi n:ii ngê Chóó Lémi ngê wa a pyidu nmo, mêdaanmî pw:oo dmi, chedê ngê daanmî pyaa dmi. ⁴³Pini n:ii dpí pw:onu, u wêdêwêdê chedê ngê dpí pyódu, u pi dpo ghay. Dini ghi n:ii ngê Chóó Lémi ngê wa a pyidu nmo, nmî pi dmi ndîî ngê wa pyódu té, nmî wêdêwêdê ndîî ngê wamye pyódu

^c 15:30-31 2 Kódin 4:10-11; 11:26 ^d 15:32 Luukí 12:19-20 ^e 15:34 Lóma 13:11; Dpodo 26:8 ^f 15:38 Gen 1:11

té.^s 44 Ala ngwo nmî nuw:o knî y:oo yiné a mbêpê kîgha nmo, ngmênê dini ghi n:ii ngê Chóó Lémi ngê wa a pyidu nmo, nmî ghê dmi knî y:oo y:oo adnyi mbêpê kîgha nmo. Ala ngwo nmî pââ dmi ntee a pyede, mu dini ghi ngê nmî ghê dmi knî yi pââ dmi amyednyin:aa ya. 45 Yinté kópu puku yedê alanté mye tóó.

Mwiyémwiyé pini, Adam,
pi ngê pyodo, ghê u mênê yaa wo.

Adam nmî kn:ââ ngê ntee pyodo, Yesu ghê kamî u kn:ââ ngê yinté mye pyodo.^h 46 Too pee u kópu dé mwiyé pyaa dniye, ghê kamî u kópu dé kuwó pyaa dniye. 47 Chóó Lémi ngê mwiyémwiyé pini têtê ngê l:âmo ngê, myomoni mbóó p:uu a ndê wo.ⁱ 48-49 Pini n:ii têtê ngê l:âmo ngê, ntee doo ya, yinté myeno pyede, u nt:anê nmî yaa dniye. Pini n:ii mbóó p:uu a ndê wo, u yoo mye yinté dé, ntee a tóó, yinté wa pyódu nmo.

50 A tîdê mbwó yoo, ntee nmo pyede, doo u ntââ Chóó Lémi kóó k:oo yinté daanm:uu ghê dmi. Mbyuu too n:ii nmî p:uu a t:a mo, nmî p:uu daadpî ya, chedê ngê wa pyaa knî.^j 51-52 Tumú kópu ngma ala, p:uu dmyinê nuw:o. Yesu u yoo vy:o yéli knî ngmê ghêlî daawa pw:oo dmi, Yesu u ngwo wa a diyé. Dini ghi n:ii ngê wa a diyé, nkéli dpuwo u dnye anmî ny:oo. Enjel knî y:oo mēdaamuwa wēê ngmê. Yélini mwiyé a pw:oo dniye, yi ngwo wa a pyidu té, mēdaawa pw:oo dmi. Lîmîlîmî ngê yi ngwo amye ngmêê nmo, kamî ngê wa pyódu nmo.^k 53 Ala ngwo n:ii dpî pw:onu, mbyuu too dpî mg:eme knî. Yi ngwo doo u ntââ mēdaanm:uu pw:oo dmi, myedaanm:uu mg:eme dmi.^l 54 Mbu ntee dpî kyopwo, dîndê dpo kuwo, kamî ngê dpî pyódu, dini ghi n:ii ngê nmî Lémi wa a diyé, yinté kamî ngê wa pyódu nmo. Kópuni puku yedê a tóó, nmî Lémi ngê wa ntiye, pwopwo wa a pw:ono, d:ud:umbiy:e wa chedê. 55 Kópuni puku yedê a tóó, nmo tpapê ngê, nmîmo,

Pwopwo wa dîpî, daawa t:ee kalê nmo,
nmî némi dmi daawa dyênê.

56 N:ii ngê Chóó Lémi u dēêpî kópu dyuu d:uudpî châpu, dono dpî d:uu, d:ud:umbiy:e dpî pw:onu.^m 57 Ngmênê nmî yikî dmi Yesu Kédisu u pwo ghay wo, pwopwo ka w:êê nmo, kwunokwuno koo, Chóó Lémi mye kwunokwuno koo.

58 A tîdê mbwó yoo, nangmê kede, nmî Lémi p:uu dpodoni nmye dódó ngmê, dpodombiy:e p:uu dmyinê dpodo, mu kópu u díy:o yiné a ngêêpî nmyo, doo u ntââ daanmyi dēê dmi.ⁿ

Ndapî ngêêpî u danêmbum

16 1 A tîdê mbwó yoo, kópu m:uu p:uu nmye nîndê danê. Yesu u yoo yélini Njuda Wee u kwo wunê pyede, ndapîni ye nmye dyede

g 15:43 Pilipay 3:20-21 h 15:45 Gen 2:7; Njon 6:63 i 15:47 Njon 3:31

j 15:50 Njon 3:5-6 k 15:51-52 1 Tes 4:15-17 l 15:53 2 Kódin 5:4 m 15:56 Lóma 6:23

n 15:58 Nkal 6:9; Tpyuu 14:13

ngmê, alanté dmyina a ngêêpî. Kópuni Nkalásiya tpémi ye nî vyu, myedmyinê d:uud:uu.° ² Wiki yintómu knî yi k:oo, mwiyé mwiyé wéni ngê, ndapî dmyinê kéké. Nmyo ngmêngmênté n:ii ngê ndapî ndîi choo kmênêkmênê, ndîi choo kéké. N:ii ngê ndapî têtê choo kmênêkmênê, têtê choo kéké. Yi ndapî dpî wiye yó. Dini ghi n:ii ngê p:aa t:aa, ndapî mêdaapinê ngee. ³ Dini ghi n:ii ngê anî t:aa, pi miyó pyile dpî ngmidi yó, pweepwee pee ngmanî d:êê, ye wanî y:oo, yi ndapî Njedusalem y:oowa úuw:o ngmê. ⁴ Paa u ya a nga adî kwo knomomê, ye a k:ii nipi anmî lee dmi.

Póól paani p:uu dpîmo nuw:o

⁵ Másióniya Wee u kwo p:aani p:aani mwiyé anî lê, kuwó y:i nmye anê lê.⁶ D:ââ miyó pyile nmyi vy:o anîn:aa kwo, ndoo apê tpii yópu y:i anîn:aa t:âât:ââ dê. U kuwó dini ghi ngê, kwéli anî lê, tpileni u ya a nga adnyi kwo, dpî ngee nódó. ⁷ U ya a nga daa kwo, Wo pyile njini nmyi vy:o nîn:aa kwo. Nmî Lémi ngê ala kópu a ka daawa a kwódu knomomê, ye dye ghi daadîi nmyi vy:o anîn:aa kwo.

⁸ Ngmênté Epeso ghêlî daanê kuwo, Péntikos u Naa mwiyé wa d:ii, u ngwo anê lê. ⁹ K:omo tpile pi yilî a p:uu a d:uu té, ngmênté pi mê yilî knî y:oo yi ngópu dmi dê kpêmî t:oo, nmî Lémi u kópu dyuu a nyêmî tumo.⁹

¹⁰ Dini ghi n:ii ngê Timoti nmye wa lee knomomê, u kwo dmyinê vuyuwu, myedmyinê cháâchââ, mu kópu u díy:o nmî Lémi p:uu ntee n:aa dpodo, yinté mye dpodo.⁷ ¹¹ U pi nangê ghîpî, ngmênté mb:aamb:aa ngê dpo ngee yó, a ka u ngwo pêtê lee we, mu kópu u díy:o nmyi mbwó yoo yi k:ii anmîno t:âât:ââ.⁵

¹² Nmî mbwó Apolosa p:uu kópu nmye ngmênté tpapê. U ya a nga a kwo, Nmyi mbwó knî yi k:ii nipi nmye wa lee dmi, yi kópu p:uu dyaa u kwo nî chedê ngê, ngmênté nî dípe, u yi u ngwo daa kwo, Ala ngwo nê lê. Dini ghi n:ii ngê u nuw:o ngê wa a vyi, u ngwo nmye wa a lê.⁴

Póól u nd:uu tpapê

¹³ A tîdê mbwó yoo, mb:aamb:aa ngê dmyinê vuyuwu, mb:aamb:aa ngê dmyinê kélîmî, namê nkîngê, dpodombiy:e dmyinê dpodo.⁸ ¹⁴ Dye ghi yintómu nmyi nuu ghi dmi numo nódó dny:oo ya.

¹⁵ A tîdê mbwó yoo, nînté kwunokwuno nmyo, Stepanas mupwoknî mb:aamb:aa ngê dmyinê cháâchââ dé. Nmyi lama ka tóó, Kîdiki Wee u kwo Yesu u yoo vy:o mwiyé a ghê dniye, ntênê nmyi vy:o a dpodo nyédi, a wêdêwêdê kîgha nmyoo.⁹ ¹⁶ Yi dnye dmi dmyinê nyêmî dé, yélini yi k:ii

° 16:1 Lóma 15:25-26; 2 Kódin 8:1-9; Nkal 2:10 P 16:5 Dpodo 19:21

⁹ 16:9 Dpodo 19:1,8-10 ⁱ 16:10 1 Kódin 4:17 º 16:11 1 Tim 4:12 ⁴ 16:12 1 Kódin 3:6

⁸ 16:13 Epeso 6:10 ⁵ 16:15 1 Kódin 1:16

a dpodo nyédi, myedmyinê chââchââ dé.^w 17Dini ghi n:ii ngê Stepanas p:uu Pódyunatas pini dê Akaikas nmyinê t:ee dumo, a ka nmyinê dy:ââ tumo, a gha mb:aamb:aa ngê pyodo. Noo a tpy:ootpy:oo nmyo, a nuw:o mb:aamb:aa ngê y:oo mê pyódu ngópu. 18Kópuni yilí nmyi p:uu noo a nuw:onuw:o dé, yi kópu yilí ntênê a ka kîmînê nté tumo, a nuw:o u ngwo a ka mêdê diyé wo. Kópuni nmye adnyi tpapê dé, nmyi nuw:o dmi y:oowa l:âmo t:oo. Yinté pini yoo mb:aamb:aa ngê dmyinê chââchââ dé.

19Yesu u yoo p:aani p:aani yélini Esiya Wee u kwo a pyede, yi mb:aamb:aa nmye dê dy:ââ ngmê. Yesu u yoo yélini Akwila cha Pîdisila yi ngomo k:oo nipi wunê wuwó ngê, yi mb:aamb:aa nmye myedê dy:ââ ngmê.^x 20Al:ii Yesu u yoo vy:o yélini a pyede, yi mb:aamb:aa nmye myedê dy:ââ ngmê. Nmyi tídê mbwó kní yi k:ii mb:aamb:aa ngê dpo numo chipé tóó.

21Nê Póól, a chóó a kêê ngê nînê chipéchipé nmyo, ala pweepwee pee ngê.

22N:ii nódo nmî Lémi u nuu ghi daadí ya, nmî Lémi ngê dpí dyênê ngê. Nmî Lémi límílmî ngê dpo pwiyé we.^y

23Nmî Lémi Yesu ngê choo a ngêêpí nmyo, mb:aamb:aa ngê nmye choo a vwuwo.

24Nmî Lémi Yesu Kédisu ngê yoo ngmidi ngê pyódu nmoo, nmyo yintómu nmyi nuu ghi dmi a nódo ka tóó.

Wu u dí.

^w 16:16 1 Tes 5:12 ^x 16:19 Lóma 16:3-5 ^y 16:22 Nkal 1:8-9; Tpyuu 22:20